

**NITIJELA OF THE MARSHALL ISLANDS  
37<sup>TH</sup> CONSTITUTIONAL REGULAR SESSION, 2016**

**5<sup>th</sup> Day (Tuesday) P-I  
January 26, 2016**

**SPEAKER KEDI:** Ilo jibonin rainin jej bar kamolol Anij kin juon rujlak in raan eman non an armej in aelon kein kobatok einwot an ri tel rein aer bed ijin non aer komoni kwelok kein aer ilo etair ilo jikin bebe in euteij an armej in aelon kein, Nitijela. Rainin ej January 26, 2016 raan eo kein ka lalim (5<sup>th</sup>) in an Nitijela in jijot, 10:00 awa kio jibbon. Im mokta jen ad wonmanlok im komoni kwelok kein kab kenono kein raurok ilo jibonin kajitok ne ri tel rein adwoj kajojo ren jutak jen komoni jar ko ad ippen dron kajitok kin wisdom eo an Anij im ankilan ilo jibonin rainin. (JAR)

Mokta jen ao lelok bwe Clerk eo en kir tok roll call eo adwoj ilo jibonin rainin jekonan bar kile ro drien kile er im kauteij er ilo jibonin. Mr. President, cabinet member rein, aolep Nitijela rein. Madam Clerk kab ri jermal rein an Nitijela. Ri lotok rein ad ilo chamber in ipped ibwilijid elon ro rar kobatok. Jot iaan kora ro jined kab elon iaan likao ro rar kobatok im rein rar kobatok. Im ij bareinwot loe ilo gallery in Mayor eo motta jen Rongelap, Mayor Matayoshi ej bareinwot kobatok im elane ebar wor mayor raar kobatok kab ro ijin ikonan kile aolep. Im elaptata lelok kile eo ejenolak non armej in aelon kein elaptata Iroj ro ad kab kajur ro droer.

Madam Clerk, wonmanlok wot.

**CLERK:**

H.E President Casten Nemra.....	Present
Minister David Kabua.....	Present
Minister Kessai Note.....	Present
Minister Jack Ading.....	Present
Senator Kalani Kaneko.....	Present
Minister Atbi Riklon.....	Present
Minister Bruce Bilimon.....	Present
Minister Daisy Alik Momotaro.....	Present
Minister Leander Leander Jr.....	Present
Senator Eldon Note.....	Excuse
Senator Mike Halferty.....	Present
Vice Speaker Jejwarick Anton.....	Present
Senator Litokwa Tomeing.....	Present
Senator Alvin Jacklick.....	Present
Senator Alfred Alfred Jr.....	Present
Senator David Kramer.....	Present
Senator Amenta Matthew.....	Present
Senator Hilda Heine.....	Present
Senator Maynard Alfred.....	Present
Senator John Silk.....	Present
Senator Brenson S. Wase.....	Present
Senator Sherwood Tibon.....	Present

Senator Michael Kabua..... Present  
Senator Christopher Loeak..... Present  
Senator Tony Aiseia..... Present  
Senator Jerakoj Bejang..... Present  
Senator Thomas Heine..... Present  
Senator Wilbur Heine..... Present  
Senator Tony Muller..... Present  
Senator Dennis Momotaro..... Present  
Senator Mattlan Zackhras..... Present  
Senator David Paul..... Present  
Speaker Kenneth Kedi..... Present

**SPEAKER KEDI:** Clerk, ilo nej roster ne an jibonin rainin komaron naj excuse-i Senator eo eutiejen Bikini/Ejit, Elton Note.

**CLERK:** Mr. Speaker ewor 31 present, 1 absent im 1 excuse.

**SPEAKER KEDI:** Innem eoun uaan Nitijela in an wonmanlok wot im komoni kwelok ko an. Im raan eo kein karuo in an Nitijela komone jermal in debate eo iloan ikijeen motion in jelke eo nae kien ak cabinet im ear file im raan eo kein karuo in. Ak botaap mokta jen ad wonmanlok ilo debate ko im continue einwot kar jen inne non rainin ewor bareinwot jot document imaan mejen ruteij rein im document kein, kein kajuon ruo petition ko. Juon petition ear drelon tok jen Senator Michael Kabua non Office eo an Speaker im ilo petition kein rej kelaajak 44 signature ko jen alap ro an Kwajalein im petition eo juon im kar address -e non Iroj im Senator Michael Kabua jen petitioner rein im rej ekkar non bonbon eo an Clerk 428 signature kein iloan rej jen kora ro mottad ilo jukjukin bed eo ad jen Ebje ne ejimwe melele ko rar itok non Office eo an Speaker.

Im ilo elajak in agenda an Nitijela, petition rej drelontok im communication kab jermal ko jot ilo item naj kar 15 im einwot ad melele Nitijela in eban tobar item 15 enaj bojak wot ilo item nombra 4 toon wot an bed ijone motion in jelke ne. Botaap jaar kadrelon e tok ekar non kajitok eo bwe jen likit imaan mejen kajojo ruteij rein ilo Nitijela bwe jen take note, put off petition kein emoj aer drelontok. Im jej kamolol ilo etan jea kamolol Senator Michael Kabua ilo an kar letok petition kein im bareinwot elaptata armej ro rar komone petition kein. Bwe iumin Article II in Jemen-Ei eo Section 1(1) ej kallikar ke maron in ebed ippen armej non petition -e government eo ilo jabrewot wawein ko grievance ak men ko rej lomnak im elotaan e non an government eo address -e jabrewot grievance ko ak men ko rej ellotaan e ilo government. Im jej kamolol kin wawein im jej rejan er bwe ren kajur ilo kain jokjok rot kein. Botaap ilo elajak ne an jibonin rainin petition in eban koba tok ilo agenda in einwot adrean loe bwe edre ne agenda imaan mejedean ej Vote in Jelke eo. Im ilo tore in inij kio kobellok floor ne non adwoj bar wonmanlok ilo debate kein im discussion kein kin vote in jelke in ebed imaan mejen Nitijela in. Ebellok floor ne?

**MIN. KESSAI NOTE:** Privilege mok ijo Speaker?

**SPEAKER KEDI:** Wonmanlok wot mok Minister eo an Foreign Affairs, Minister Note.

**MIN. KESSAI NOTE:** Inna kommel Mr. Speaker. Naij baj wonder ewi wawein an kar bed ne baj communication kein ilo jikin bebe in ilo aer kar jab itok ikijen Communication. Ak privilege eo an tu jab e konke ejab lukun eman amean ronjake ilo jikin ronjake ka im jot iaan mic ka im headphone ka rejab bar jermal im ne jemaron kakije jidrik im kajeon kokomanman-I lak bwe ejab ije wot ak armej rej kennaan tok ke ejab lukun eman aer ronjake amean kenaan ije bolen jen tu rok ak tu jab ke rejab kanuij eman. Jot iaan headphone ka rejab jermal.

**SPEAKER KEDI:** Kommol Mr. Minister. Ekkar wor tok juon kajitok non jea inne jen Senator Michael Kabua im edre eo kajitok kar inne ikijeen kar kein jermal kein im edredrelak kio jibon emoj kar keboje einwot an eman an driwojtok mic in an Senator Michael Kabua. Ak ekaal kajitok in juon an Minister Note kio jibbon im ne jemaron kakije jidrik im lale ewi wawein an menkein jermal. Ak mol ke ne radio ne ilo kio jibon kab aolepen raan ko liktak kab jen alon ko lak radio station ne adrean ebwe an ekkowadran an driwojtok. Im ejab kanuij eman an jot iaan aelon ko adrean ronjaki ak kwelok ko an nitijela rar wonmanlok wot. Ako jenij kakije jidrik im lale ikijeen headphone ka im jermal ka jot. Nitijela enij wonmanlok wot ilo kwelok kein rainin elikin ad nej lale jokjokin kein jermal kein.

Nitijela enaj kakije jidrik.

**(KAKIJE)**

**SPEAKER KEDI:** Nitijela enij bar jeblaktok ilo jibonin rainin elikin kar kakije jidrik eo non lale kein jermal kein im tomak ke aolep kein jermal im eman ilo torein. Im jenij wonmanlok wot einwot ao kar ba ekein lak jidrik ikijeen rainin kein karuo ilo ad wonmanlok wot kin debate ko im rej require ilo Jemen-Ei ne kab rule im procedure ko ikijeen motion in nae cabinet eo. Im ebellok floor ne non wonmanlok wot ikijeen debate kein.

Inaj kile eok Mr. President, His Excellency President Nemra, jouj im wonmanlok wot.

**H.E. PRESIDENT NEMRA:** Kommol Mr. Speaker. Mr. Speaker, mokta jen ao kwalok jejo naan ilo jibonin rainin bar bok ien in eman im lelok ao naan in nebar im kamolol jemed woj ilan kin mour im ejmour. Bareinwot Mr. Speaker, ikonan bar likit ao naan in kile im kauteij ro drien kile im kauteij ilo jikin bebe in an armej in Majol. Kwe Mr. Speaker kab Vice Speaker eo ad. Iroj im leroj ro ilo mweo imon Iroj koba owner eo. Bareinwot Iroj ro im Leroj ro ibellakin kab ilikin aelon kein. Ri kaki ro ilo kabun ko korain ri kaki ro jined. Member in cabinet rein bareinwot member in Nitijela. Rein woj mottad im rar kobatok ilo jibonin rainin non aer witness -e kwelok in an Nitijela. Im kile im kauteij non aolep armej in Majol ilo kona ko emen ibellakin Majol in kab ro ilikin Majol in.

Mr. Speaker, ikonan kwalok jejojo wot enaan ilo ao itok ilo ejab nememein debate ak baj kwalok jot ao kolmenlokjen ilo wawein in emoj an jedmatmat imaan jikin bebe in an armej in Majol. Im ikonan bokliklak koj non jot raan ko rejab kar etolak jen rainin ilo kar 4 raan in January eo ak raan eo Nitijela ekar jeblaktok ekar non Jemen-Ei eo. Jouj ej kememej kar juon raan ebwe an kar lap im aiboujoj im ear bareinwot bed ilo bwebwenato in aelon kein kin tobrakin kar jermal ko rar walok ilo 4 raan in January eo. Jouj melele ta ko rar bok jikier ak men eo ikonan komejajaiki kin jonan mejatoto eo ekar walok ion aelon

kein. An armej bed ilo juon mejatoto in kojotrikrik kin ta in emoj an walok ilo adwoj kar ejjelok kotomene im jela ke emaron kar walok wawein eo ear bok jikin ilo 4 raan in January eo.

Im Mr. Speaker, juon week jen tore eo 11 raan in January eo ekar walok naan eo jen eo kar kalet e jen chamber in an Nitijela. Im naan eo ejab juon naan ear aitok, ejab juon naan ear bok ien elap im komelele ki konke ej bedbed wot ion manit kein ad. Einwot koj armej in lale dron im yokwe dron elaptata. Im naan in ij kenono kake ej "Wodde Jipel" kab "Drijo im Ukoj". Im ke ear driwojlak naan eo ej driwojlak non rein iloan Nitijela in, colleague rein ej bareinwot driwojlak non kajojo ministry im agency ko ilo ad aikuij jermal ippen dron non emanlak eo non armej in Majol. Bareinwot non drolul ko an kora im jodrikdrik business community ko ilo ad aikuij juon wot boro im jermal ippen dron im burukuk im iuun maanlak kotobar kein an lalin ad bwe elukun drik ien, kar message eo. Menin ear bok jikin ilo 11 raan in January eo. Im ejja ien in wot jaar introduce-i cabinet eo ro me renkar itok im bed ion wa in ilo etan waan armej in Majol im dribuki lan im men kein rebed imaan non lale ta eo eman non lalin ad.

Elikin rainin Mr. Speaker, 11 raan in January cabinet kab Office an President jaar kwelok ippen elon ro rar lotok koj jen ijoko retolak. Im ear itok letta in kojeramon ko ejab non office kein ak nan armej in Majol. Im emoj an bar itok ilo bar 11 raan eo jar in ekabit eo jen rikaki eo jemed ilo chaplain. Emoj an kabiti ro uaan cabinet eo kab rein wot ilo Nitijela kin juon jermal emoj an dredrelak. Im ejja tore kein wot elikin ad kar itok non chamber in elikin 11 raan eo cabinet ear wonmae im kwelok ippen elon ro rar lotok koj ilo naan in kojeramon kab elemekot ko jej lomnak in bok bunton ko non iuun maanlak im lonaj mour non armej in Majol. Thursday eo ilo 14 raan cabinet ej kwelok ippen juon ruteij ear ketok jen Washington D.C im ej boktok naan in kojeramon ilo etan kien eo an America im jej bar lelok naan in ad itok limion im burukuk ilo an nej reimaanlak non juon wawein jermal ko renij eman non ad bukot mejlan aban kein eo im emoj an bunit armej in Majol kin issue ko ippen United States. Kwelok in ear komon ilo elikin ralepen Taije eo ilo 14 raan. Ilo tore eo ej file pre file motion of no confidence eo ilo torein ej pre file motion of no confidence eo. Baj na eo iar mokta ilbok einwot nememem armej im mejatoto ear itok ippa elaplok im enin naj bok non rainin. Elap ao kar buromoj kin ta in emoj an kar walok. Im ijjab buromoj kin na make bwe koj armej jej itok im etal. Ak ij buromoj kin lalin ad kin ta in ewalok. Ta in emoj an bok jikin elaptata non armej in Majol. Kin ta ko rar walok raan ko imaan non tore eo ear file.

Mr. Speaker, 18 raan jaar bar jeblaktok non ijin ekkar non kir eo am non ad jerbale ejelok bar juon issue in jermal ijellokin vote in jelke in.

SEN. BRENSON WASE: Point in order mok Mr. Speaker?

H.E. PRESIDENT NEMRA: Speaker, imaron ke wonmanlok wot?

**SPEAKER KEDI:** Kommol. Ne imaron mokta kile point in order eo Mr. President, ekkar non rule kani rro ej priority ilo elaajrak ne, ne imaron kile mokta. Wonmanlok mok Senator Wase.

**SEN. BRENSON WASE:** Kommol Mr. Speaker. Kab kauteij aolep armej in Majol. Im naj kauteij Mr. President kin statement in an ak menin ej report jen President eo non lal in ad ke kota ej mottan debate-i motion ne. Kommol Mr. Speaker.

**SPEAKER KEDI:** Kommol Senator. Ilo kar instruction an jea ilo naj wawein adrean debate-i menin aolep wawein kenono kein ilo jibonin kab aolepen raan kein me jenij aikuij debate-i motion in enaj aikuij bedbed wot ion melele ko rar itok jen mona eo juon kin ta unin vote in jelke in. Im ij kajitok im inaj bar kojebalwaj non eok Mr. President, with all due respect non eok ak ij kajeon ne komaron kajeon ettor wot iloan melele eo ikijeen an kar drelontok melele ko jen mona eo juon ikijeen vote in jelke in.

Jouj im wonmanlok wot Mr. President.

**H.E. PRESIDENT NEMRA:** Mr. Speaker, ke ij kenono ij kenono kin vote in jelke. Jouj im jab bar kotolak bwe juon senator en kobjrak ao kenono.

**SPEAKER KEDI:** Mr. President kम्मol. Kejro enaj aikuij lori rule ka ejjab unin ao kotlok konke senator eo jen mona eo juon im senator eo jen mona eo juon ak rule kani rej lukun kalikar ke ne ej itok point of order jej aikuij entertain -i. Im jolok bwod ne ej itok im inaj kajitok understanding eo an senator ro jot bwe ren ja kotlok opportunity in non an President eo wonmanlok wot im komane statement e an. Im ij kajitok ippem bar juon alen Mr. President, jouj im ettor wot iloan melele ko emoj adwoj erra kake ilo rebelton jermal elaptata rule kein ad iloan Nitijela im chamber in.

Wonmanlok wot?

**H.E. PRESIDENT NEMRA:** Emman kम्मol Speaker. Kab jej ettor wot iloan menin jej bed ie rainin. Ejanin oktak jen kenono in jej bed ie im naj kamolol e eok im kile office ne am.

Einwot ao kar ba Mr. Speaker, ke jaar roltok ilo 18 raan eo im men eo jaar kenono kake kin rule im procedure ekkar non jermal kein an Nitijela. Im ilo rainin Mr. Speaker, iar jab bok kwonao im kenono konke ij kotar un eo bedbed in an kar jarjar im wonmantak vote in jelke in im un eo ear jab walok ilo 18 raan. Ak rein jot rar bok kwonaer ak iar baj kotar wot naet eo enij kar itok un eo.

Ilo 25 raan eo, raan eo inne eokwe ear walok jaar loi ilo communication e ar itok ejjab communication ak handout e ear itok im senator silk ear bareinwot bok kwonan im kenono im kajeon komeleleik Nitijela in, cabinet in bareinwot aelon kein kin bedbed in unin an vote in jelke in wonmantak. Im emoj an walok ke im lukun kalikare ilo ad kalimjok wawein eo ear walok inne muktata elukun alikar Office eo an President im cabinet ejelok eon ko ilo Jemen-Ei en ear loke. Jaar jab violate-i wawein an juon administration eo ekaal ejaak im komoni jermal ko an. Jaar lore ekar non Jemen-Ei eo im menin elukun alikar ilo an un e walok ije.

Men eo ij loe kein karuo, ejelok policy cabinet in ear komone bwe en joren ak entan armej in Majol. Ejelok, ejelok juon policy ak position kien in emoj an kar kojedeiki non Nitijela im ej juon policy eo me emaron metak armej in Majol kake. Un rot ko kein me ilo ao watoke ej non nae ialen juon vote in jelke. Ak meneo ear wonmantak ej bedbed ion nomba. Nomba. Ak ej kab moj ad loe juon nomba ilo 4 raan in January eo armej in Majol raar witness -e. Ak men eo ear wonmantak in it comes down to nomba. Emoj juon in wawein jenij aikuij kenono iloan ikijeen nomba. Ilo ad melele ke im bed ilo ainemon in im kolmenlokjen in ke jejela kio ke ejelok eon iloan Jemen-Ei in emoj ad loke kab rube. Im jebar jela ke ejelok policy kien in ear komone im bedbed ion naan eo ear walok ilo 11 raan eo juon naan in jermal

ippen dron ej bareinwot ejab idraptik ippen Jemen-Ei eo. Im menin kio jejela im elukun alikar. Ak un eo in kin nomba. Emej ij baj lomnak, nomba. Ne eitok non manit ne alap eo im ri jermal eo erro komon bebe ak erro ruo ak Iroj eo ejaje, emoj ren wonmanlok kin bebe ko ion bwidrej eo ke? Nomba, ne eitok non manit. Ne eitok non jikin jermal im ruo nurse erro karaoke im plan -e diagnostic an ri naninmij eo ak doctor eo ejaje erro wonmanlok kake ke? Nomba. Ne eitok non ekklesia ko ad, ruo deacon erro bebe im karok naan eo ak ri kaki eo ejaje kake en wonmanlok ke? Kenono kin nomba.

Mr. Speaker, men eo jej burmoj kake in bwe aelon kein elap aer mweir kin wawein in emoj an Nitijela komone rainin. Juon in wawein ebed ilo bwebwenato. Juon tore elikin ekalel eo ekar lap enjake im kojotrikrik. Itok non 4 raan eo, itok non naan eo ear walok im ewalok wawein in. Im wawein in einwot juon madre eo me emoj an wekare juon armej ejanin jutak. Ej babu wot ak rewekare bwe en kar jutak im komoni jermal ko an. Cabinet in ejanin jino jermal. Jonan ke jot iaan minister ka rejanin bed ilo office ka aer bwe rej komoni wot. Ak ewalok madre in kin nomba? Juon wa eo rejanin bwili ak ebojrak, kin nomba. Ta eo ebin ne Nitijela in eletok jidrik ien an cabinet in jermal im kajeon jermal ippen Nitijela kin kotobar im loe ta eo jemaron lonaj im letok jeramon non armej in Majol ke einwot naan eo elukun alikar. Einwot kar melele eo aolep rein uaan Nitijela rej erra kake, public ej erra kake ej naan in, "Ippen Dron, "Wodde Jippel", "Drijo im Ukoj" im naan in ilo ad jab wonmanlok wot im likit aelon kein im armej in Majol imaan. Ak ej naan non ad bar reilonlak im kajitok tel jen eo ej ri komanman. Im naan kein rej bar atartar wot ion preamble eo an armej in Majol einwot ilo an walok ilo bedbed in kotobar ilo Jemen-Ei in ad. Eo ej ba ke ne imaron quote "Kin Jemen-Ei in kemij kabin e konan im jimwe ko am bwe komin mour ilo ainemon im jokane. Kauteij kien anemkwoj im kejbarok jimwe ko an armej. Burukuk ippen armej ro jot ibellakin lalin non kejbarok ainemon im jokane eo an lalin im bwe kim naj kate wot kim jonan wot am maron bwe jibadbad kein ren maronin tobrak. Mour ainemon im mour jokane". Ta in Nitijela ekomone non armej rainin. Jaar ron inne jot ian ri kwelok rein rej ba ke rej bed iloaan mwiin rej kenono ilo etan Iroj ro im armej ro. Eokwe buromoj eo ao in konke menin emoj an disconnect. Konke ejab kolmenlokjen im konan an Iroj im armej ro enin Nitijela ej komone rainin, ewor disconnect. Majol in ej aikuij bwe Nitijela in en jermal ippen dron im wonmanlok jen ijin. Ejab aikuiji menin. Im naan ne miniorty iloaan Jemen-Ei in ejelok. Jenij bukote naan ak ejelok. Bwe nomba eo ear walok eneo ilo 4 raan in January eo.

Kio ewalok vote in jelke ne imaan im ejjab to jen kio jemaron nej komoni vote ko ad im kajitok eo in won ri kwelok ej vote aet ak won ri kwelok ej vote jaab? Ak kajitok eo in ewi ijo armej in Majol rej bed ie? Aet non rubrub ak jaab non jermal ippen dron im wonmanlok. Aet non konan an jot ak jaab non likit armej imaan im kien eo ej jermal non kotobar ko an armej.

Eokwe Mr. Speaker, naan jidrik ko kein ikar konan share-i ilo jibonin rainin. Ejab jot naan ko raitok ak ej ettor wot iloaan jokjok in me Nitijela ej madmod e ilo rainin. Im non killi naan jidrik kein ao Mr. Speaker, ao naan in kamolol im kojeramon non naan in jar ko jen ri kaki ro jemed im elon ro nukid im mottad elaptata lellap ro non aer kobatok im kwalok aer jab erra kin menin ewalok. Ak naij bed wot ilo kojotrikrik bwe men otemjej ewor ialan. Bwe ne eitok non kalet nan juon ri kwelok ejelok juon iloaan mwiin ejela ta kalet eo an, Anij wot ejela. Bwe lalin Majol in ej lalin Christian im ijo jej likit ad kojotrikrik ie in. Ekadu tellok in Mr. Speaker ak eitok belok in. Kommol Speaker.

**SPEAKER KEDI:** Kommol Mr. President. Im ilo torein inaj baj lelok non ne ewor jabrewot ekonon bar konan bok kwonan?

Inij kile Senator Michael Kabua. Jej bed wot ilo tomak in ke jouj nej karejar im ettor wot iloan melele ko joj ar erra kaki. Wonmanlok wot Senator.

**SEN. MICHAEL KABUA:** Eman kommoll Speaker. Ij erra ippem ke jej aikuij ettor ilo melele emanmon ko jaar ronjaki kio, elap aer emman.

Speaker, mokta jen ao ba jidrik, eban aitok bwe enij bukwoj kolmenlokjen ko an armej jen melele ko rar walok kio jen His Excellency President e adwoj, Nemra im kamolol e kin juon statement elap an emman eo me ej ekejel wot ilo melele in vote in jelke ne. Ak ikonon mokta kwalok ao kile im kamolol eo ej letok mour im ejmour non kijwoj aolep elaptata non Office ne am Speaker im an Vice Speaker eo. President eo im cabinet eo. Kajojo Nitijela rein uaan Nitijela rein mottaro. Elaptata non Iroj ro im armej ro aer Nitijela in kab rein rar kobatok jibonin non aer ronjake kenono kake ke ej Nitijela eo amiean in ejab im komean iloan mwiin ej rijilok bedrejdrej ro amiean ilo lale ta eman im wonmanlok ko an aelon kein. Im naan in ikonon ba ke ebed ilo minute im barenwot ilo journal kane an Nitijela im ear walok jen President/Irojlaplap Amata Kabua, President eo kar adwoj, ear ba jen jab meloklok bwe kojean ej rijilok bedejdej ro an armij in aelon kein. Im aolep ro rej itok nan ijin im enwot iar kwalok ilo inne im naan in ej ba Ura. Im Ura Mr. Speaker, elon ajiri ro rej kirtok na im kajitok ta melelein im ikonon ilo kautej ne imaron wonmanlok wot im kwalok melele in naan in. Im Nitijela in ej kien eo eutej tata adwoj ilo aelon kein, ej an Iroj ro im ej adwoj ilo ejelok ba utej lok im etta lok ak ej adwoj jimor ej Kien eo eutej tata in. Im ilo etto, jemaan kon kien ko ad ej Iroj ro ad im enin joj ej koba iben dron ilo Nitijela ej ijo eutej tata im ej Kien eo ad in rainin. Elane ej mij juon Iroj ilo ien ko etto, rej mane aolep rijerbal ro an nai iben im julok men ko mweien reaurok nai iben im ilo ao baj kalimjek kojean ijin ilo Nitijela in, kojean aolep ej ura, ej ri-ura ro nan Nitijela eo an aelon kein ej ijo eutej tata in im jebojak in mij ie im jutak kon aelon kein ad. Mij iben Kien eo ad eo me ej lolorjake im boktok jeraman ko nan armij in aelon kein. Ekwe ej melele eo ne ikijen kojwoj uaan Nitijela.

Im Speaker kommoll, iar kajitok bwe in ba jidrik wot ikijen armij ro ilo Kwajalein enwot ke melele ko jaar ronjaki ej ba ej juon Government eo elukin, emojno, ekkar nan vote in jeleke e ilo nomba 2. Ak ilo mol kojean make iloan mwini jenaj im uaan Nitijela jenaj make komojnoik kojean ak Speaker, ijab lo mojno eo an Kien eo an aelon kein ijelokin wot ne enaj wor wewein ko jenaj litok im kadooki kake, einwot juon wa eo enaj rumlok. Im petition ne kommoll bwe kwar letok mene ejab bed ilo im eban bed ilo agenda in ak ej mottan wot konono ko an vote in jeleke ne enwot amiean kalimjeke im emoj an lolo imaan mejen kajojo rikwelok rein im ej konan eo an armij in Kwajalein ne im ej mottan wot vote in jeleke in im rej letok bwe jen barenwot lomnak kake ke vote eo aer enne ej vote jab, jutak ilikin kotobar ko an Kien eo kio barenwot enne ej kajitok bwe jen bukot aeloman im jokane eo iloan Nitijela in nan aelon kein ad, jermal iben dron bwe ritto ro rar ba kajur wot wor.

Ekwe eban aitoklok naan kein ao ak ikonon kobaik tok rikwelok ro ruo motta enwot ke bolen petition in elab an iok tok kemjel im barenwot nan amiwoj ronjake kajojo aelon ko nan lale kajitok im aikuj in aer

bwe jooj en jibwe pein dron, jermal iben dron ilo wewein eo im men eo elab aer kajitok eo aer in iloan petition in ta eo ruwon Government enwot an lolo ijin, ej oktak tok kajitok in nan bar kojwoj aolep im ejjab maron in lale bwe ilo raan ko reiet wot ejanin jermal wot Kien in adean ak jelemantak wewein in ilo juon wewein eo ekkar nan Jemen -Ei ne im jej ron ke juon im emen wot remaron lemantak jabdewot wewein ilo wewein ad komane vote in jeleke eo. Ak ekkar nan un kein im jej lali, juon wewein eo me ejjidimkij ak jej loe ijone ej ba juon Government eo emojno ak enwot ao ba ke enaj mojno ne kojean naj make komojnoiki ak Government in elab an kajur Mr. Speaker im buromoj eo an armij in Kwajalein in elane jean naj jebel jen dron ilo wewein ad emakitkit im jermal bwe ijo enaj walok mojno ie ne.

Speaker, kommel im ij kamolol President kon aolepen naan ko an bwe Majol in emelele kaki, kojwoj aolep ijin elab tata nan kojean ilo jikin kwelok in. Speaker kommel.

**SPEAKER KEDI:** Kommel Senator Michael Kabua. Ej bellok wot floor ne. Inaj kile Senator Wase, ij bar rojan juon alen bwe jen ettor wot loan melele ko me ijo emoj an Nitijela in erra kake ilo wewein adean naj debate. Wonmanlok wot.

**SEN. BRENSON WASE:** Kommel wot Mr. Speaker. Im bar juon alen ikonan kamolol jemedwoj ilan kon wewein kein woj emoj an karoki through founder ro ad, Iroj ro rellab im armij ro me rar karok Jemen -Ei in bwe en juon supreme law eo armij in Majol rej mour ion elab tata kon principle in democracy.

Mr. Speaker, ewor ao tomak ke imaron in konono ilo etan delegation e an Majuro, enaj wor aer kakobaba ne rekonan ak aolep ien mantak elikin an walok result, official result ko, Majuro delegation ej solid. Im ij tomak imaron konono ilo etan 3,000 eo raar kelot juon, 3,000 eo ear bar kelot juon, 2,900 plus eo ear barenwot kelot juon, 2,800 plus eo ear bar kelot juon, im 2,600 plus eo ear bar kelot Senator eo eliktata. Im ij tomak kemjean maron in konono ilo etan Iroj ro amjean kon leke in im kon nomba in vote kein konono kaki.

Mr. Speaker, na ikonan leliklok wot jidrik kojean bwe en wonmantak nan tore in rainin im tore eo me ekar pre-file Motion of No Confidence eo. Ewor juon jabon kenaan ej ba, "The ultimate threat to trust, honesty, im integrity, integrity is deception.

Mr. Speaker, elikin an itok official result ko ekar wor side ko ruo rar koba iben dron im komane men eo rej ba coalition nan kajion in ejake Government in. Im ilo 2 raan in January eo, coalition in ear komane men eo imaron in refer nane ej "The last supper" ak mona in kojabwe eo mokta jen 4 raan in ekele eo. Im ilo ien in ekar wor commitment ear walok jen kajojo member ro me ej 20 iuaer ke renaj jutak ben kon commitment eo aer nan Solid 6 ro kab nan coalition eo. Iburomoj in ba ke ilo tore in 2 raan in January eo ear koman primary ko an coalition in...

**MIN. KESSAI NOTE:** Kajitok mok Speaker?

**SPEAKER KEDI:** Ta ne ijone Mr. Minister?

**MIN. KESSAI NOTE:** Inna jej kenaan kon vote in jeleke in ke?

**SPEAKER KEDI:** Kwoj privilege ke kwoj point of order ke?

**MIN. KESSAI NOTE:** Ij point of order, privilege, kajitok.

**SPEAKER KEDI:** Wonmanlok wot kon point of order ne?

**MIN. KESSAI NOTE:** Ij kajitok bwe jen konono wot kon vote in jeleke ne, ejjab kon Solid 6, ta ne coalition, whatever, vote in jelke ne ekkar nan kar melele ko lok iman.

**SPEAKER KEDI:** Kommol Mr. Minister. Wonmanlok wot Senator.

**SEN. BRENSON WASE:** Kommol wot Mr. Speaker kon am ba ke naan kein ao rej in order, ak ij konono kon jekjek in adean kar wonmantak bwe jen arrive ilo jermal eo elab ilo 4 raan in January eo. Im ij ba ilo 2 raan in January eo ilo ien eo ear koman mona in kojab eo ak the last supper, ekwe ear koman primary ko. Im ilo ien in ekar wor candidate im rar komane primary eo im komane juon democratic process ilo election im alikkar jen coalition eo ilo aer solid im kar komani commitment ko aer ke juon wot...

**SPEAKER KEDI:** Point of order Mr. Minister ejimwe ke?

**MIN. KESSAI NOTE:** Point of order.

**SPEAKER KEDI:** Wonmanlok wot mok?

**MIN. KESSAI NOTE:** Naij kajitok bwe jen konono kon vote in jelke ne ej bed iman kio, ejab kon won ro rar coalition ilo tore ko remotlok.

**SPEAKER KEDI:** Kommol Mr. Minister. Ikar kajitok ilo raan eo inne jean en bed wot loan kar un eo me ear walontak enwot an kar presented ilo document ko ebed iman mejen kajojo rikwelok kio ak emoj adean aolep loki ilo statement ko kio ej jibbon. Im ij lomnak enaj fair bwe jen kotlok bwe joj en bok kwonad kio ekkar nan adwoj aikuj bok kwonad ilo vote in jelke in. Im ij tomak bolen Senator in eventually kwoj konnaan kon vote in jelke eo, ej tomak eo ao in. Inaj bar lewaj jidrik ien bwe kwon wonmanlok wot im ne etar jen jonan im ejab ekkejel loan vote in jelke eo inaj kabojrak eok.

Wonmanlok wot.

**SEN. BRENSON WASE:** Kommol Mr. Speaker im inaj bojrak jabdewot ien eo konaj kabojrak io. Ak kommol bwe ko-kotlok ao lelok history in wewein jermal kein reurok bwe Government eo in jej konono kake im aet edrik ien ak eaurok ien.

Mr. Speaker, ilo primary kein kemwoj ar koman amwoj commitment ke juon wot adwoj candidate. Iburomoj bwe joj ar jab mol nan dron, elak itok ilo 4 raan eo me jej ba eaurok, ekwe eaurok bwe jaar jab kamol commitment ko ad.

Mr. Speaker, ilo motion ne elukin clear im ej kalikar im ewor ilo Jemen -Ei ne majority, ewor simple majority ej kalikar ke elane simple majority eo an Nitijela ej 17 im ne ejelok 17 ibam ijaje enaj elmen am push –I agenda ko am, enaj elmen an pass resolution ko an jeban ro an Foreign Mission ko, enaj elmen ad pass -e resolution ko an member ro an PSC, Judge ro, elab tata budget ne Mr. Speaker, bwe rainin budget ej an Cabinet...

**H.E. PRESIDENT NEMRA:** Privilege Mr. Speaker?

**SPEAKER KEDI:** Wonmanlok wot Mr. President, kon privilege eo mok?

**H.E. PRESIDENT NEMRA:** Emman. Ilo naan eo ao ear ejelok reference nan majority, naan eo iar ba ij ba minority enwot an bed ilo enbwinin un e me ej jarjar im wonmantak ilo vote in jelke in.

Kommol.

**SPEAKER KEDI:** Kommol Mr. President. Ejimwe ij bar erra ibam ke ekar naan eo kwar kojobale ej minority. Ak jabdewot melele eo senator eo juon ej kajion lelontak jen kotlok bwe en baj bok kwonan enwot an kar senator rein kotlok adwoj ro jet imanlok bok kwonaer bwe en jokkin wot juon adean ettor manlok ijin, kotlok bwe ren kadedelok statement ko aer im ne ebaj dedelok, ro rebaj konan bok kwonaer ren baj walontak im bok kwonaer. Jouj im karejar bwe elane ejab jekjek in dre in innem jea emakoko in point of order jen je iman ak ne enaj aikuj innem enaj komane.

Privilege Senator Tibon, wonmanlok wot mok.

**SEN. SHERWOOD TIBON:** Inna kommol Mr. Speaker. Senator e motta ej konono ilo etan 10,000 armij, emaron ke jab kakure an kenaan? Kommol.

**SPEAKER KEDI:** Wonmanlok wot Senator Wase.

**SEN. BRENSON WASE:** Kommol wot im naj kamolol colleague e motta kon an kakememej im ejab 3 wot taujin men eo ilo Majuro in ak ej 10,000 im kemij...

**MIN. KESSAI NOTE:** Speaker?

**SPEAKER KEDI:** Nitijela in ej kakkije 3 minute. **(kakkije jidrik)**

Nitijela ebar joblak tok nan adwoj bok melele iben dron kab elab tata koman bwe en emman wewein ad ettor manlok ilo jermal aurokrok in an aelon kein im barenwot nan kar lale jet ian microphone kein rar

jab jermal. Im kamolol bwe emoj an joblak tok Senator eo juon mottad, Madam Clerk, wonmanlok wot im likiti ilo present, ejako an excuse kio Senator Eldon Note. Im jenaj wonmanlok wot im inaj bar kojeblok floor in nan iben Senator Brenson Wase. Bar juon alen eliji elikin kar kakkije im bok melele iben dron kab erra iben dron jen bedbed wot konono kein ad ilon vote in jelke in im elab tata ilon uak eo an mona eo juon kon ta unin vote in jelke in.

Wonmanlok wot Senator.

**SEN. BRENSON WASE:** Elab am emmol Mr. Speaker. Im kautej aolepen melele ko kab karok in adwoj jerbale wewein in im jermal in eaurok ilo etan armij in Majol.

Mr. Speaker, elane ekar jirilok konono ko im eletok history ekwe am wot bebe ijone nan strike –I. Im ne ikar bod ilo ao konono ekwe jolok ao bod ilo etan 10,000 armij in Majuro. Ak Mr. Speaker, minority kab majority erro ej opposite, ne jio ej minority ekwe jio juon ej aikuj majority. Im ne ejelok nomba iben Kien eo rainin innem ejab juon, jemaron in ba ejelok an governing mandate ak ejelok an governing body. Im ijo motion ne ej ba in, emoj an framer ro ad ilo Jemen -Ei in likiti im karok ilo enbwinin Jemen -Ei ne im ej jekjek eo in jaar bar konono kake inne ikijen parliamentary system ke ne ejelok am nomba enaj ben am govern -e Kien in bwe enaj ben am limantak agenda ko im kanne aolepen menin jermal kane reaurok nan iun manlok Kien in. Im ej tomak eo amean in ke ejelok an Cabinet ne rainin im party eo ej support -e governing mandate. Emoj ewi naj jekjek in kamol mene, ekwe measurement eo ne, method eo ne nan kalikar ewi ia eo ebed governing mandate eo iben kon vote in jelke in, ijo dre in enaj alikar im kalikar ke ewor ke governing mandate iben jar eo juon, ke ta ewor iben jar e juon. Emoj men eo dre ne bwe en tan kalikar im kamol nan armij in Majol ke jej aikuj in dispose –I motion in jelke in. Im ejab nana mene, enne ej lolo ilo menin im Iroj ro rellap im framer ro elab tata founder eo an lal in, rar kile ke juon in tool nan juon new beginning ej enin vote in jelke in. Ekwe iban bar wonmanlok wot bwe bolen ebaj lab ao konono ak jekjek eo in im reason eo dre in.

Ilo kautej Mr. Speaker, kokanoj in emmol.

**SPEAKER KEDI:** Kommol Senator ilo am melele kon ruling eo an jea ikijen debate kein ilo jibbonin rainin. Ebar wor ke? Ikar lo pein Senator Tony Muller, wonmanlok wot.

**SEN. TONY MULLER:** Speaker kimmol. Lewaj bar juon alen ao naan in iakiakwe aolep im lelok nebar im kamolol nan Anij jebed ilan kon rujlok in juon raan emman, kon mour im ejmour, kon plan im karok ko an elab tata kon jolet in kolmenlokijon. Ikonan kile eok Speaker im jea eo an Vice Speaker in ad, President in ad im Minister ak Cabinet in an, aolep rikwelok rein motta loan mwin, Iroj ro ad, Leroij ro ad barenwot, Alap ro im armij ro droier, aolep armij in Majol. Im juon iakwe eo ejenelok nan rein rar koba tok im witness -e kwelok kein ami.

Speaker, ne joj reito reitak ilon mwin kom naj loe im kamol ke rein rej jijot ilo jikin bebe in an armij in Majol, jikin bebe in eutej an armij in Majol, ejab ro me eiet vote ko aer ilo aelon kein ak ro elon tata vote ko aer ilo aelon kein, nomba. Ke jaar kajijot eok Speaker, nomba, ke jaar kajijot Vice Speaker in ad,

nomba, jenaj ita ke system eo adean in, system in ad ej bedbed ion nomba, ke ear jijot President in ad ilo 4 raan eo, kon nomba ilo tore eo. Rainin tomak eoktak nomba ko. Im imaron wanjonak Speaker kon Monday eo jaar vote –I wewein adean naj madmode vote in jelke in adean, minority rar vote jab nan secret ballot, majority rar vote aer nan secret ballot im enaj eindre in adean madmode secret ballot in ad rainin. Inne Speaker, kojean ar lale naet eo enaj kar rol tok Nitijela nan kwelok, minority ro rar ba Thursday, majority ro rar ba rainin, enin kojean moottok rainin. Im emman aolepen naan ko an both side, ij tomak elet aolep side ka, elet naan ko ak system eo adean in, nomba. Im bolen enaj juon bar kaitok lak naan ak ij wonmanlok wot im koman ao bebe Speaker, bwe en kilok debate im jen wonmanlok wot im dispose –I motion in.

Kommol.

**SPEAKER KEDI:** Ewor juon motion ilo floor im ekajur bwe en kilok debate, jen wonmanlok wot im entertain –I vote in jeleke in rainin. Im mokta jen ao kotlok motion in, ikonon wot kwalok ke ij bed wot ilo kalimur eo ikar kalimur kake jinoin an jarjar vote in jelke in nae Cabinet bwe enaj iwoj opportunity ekkar nan Article IV Section 15 in Jemen -Ei eo ad kab rule ko me rej kojabweik article in, rule 3, rule 7, rule 8, rule 70 kab rule 112, jenaj aikuj kotlok opportunity eo nan aolep ro rej konan bok kwonaer bwe ren bok kwonaer. Ak ewor juon motion ijone emoj an ben im enaj bed ijone nane ededelok debate kein inem jenaj wonmanlok wot im entertain –I. Ej bellok wot floor ne nan konono kon vote in jelke in.

Wonmanlok wot Minister eo an Justice, Atbi Riklon.

**MIN. ATBI RIKLON:** Bar juon alen kummol tata Speaker im lewaj morning bar juon alen nan kwe kab Vice Speaker Anton, kautej komro aolep kab President in adwoj, kab Minister rein im Senator rein, Iroj ro ilo mweo imweier kab aolep ijoko rej bed ie, elon Iroj ellap rebed ilo tulikin Majol in ikonon bar lelok ao kile er kab katuej er, armij in Majol im kab kojean aolep senator rein woj im armij rein iloan Chamber in jikin bebe eo an aelon kein. Kwon kab kajimwe io mokta Mr. Speaker, bwe ij kajion in lale ne ejimwe ao bonbon ilo emaron bwelen lon ijon iar jab lale ak ilikjab jene bwe en jejet jete raan motion in ear wonmantak. Imelele ke ewor, ear receive ilo January 14 raan im ejanin lon ien arro linri rule ko an Nitijela ak kwon kab naj jouj im kajimwe kojro im lak moj wonmantak iloan Nitijela ilo 18 raan. Elane enaj ella motion eo rainin inem enaj bar bok 14 raan ekkar nan Jemen -Ei in bwe en wor juon President. Im LC eo ebed ijone emaron kajimwe io ak melele eo ao in bwe enaj bar 14 raan mokta jen an wor juon President kaal, total aolep, 26 raan, kobtatain juon allon. Jet kein raan rellon kab reaitok, aelon kein ej ebebe kio im lale ta ewalok enwot ilo naan ko an President e. Ak naj konono wot kio ilo an wonmantak...

**SEN. DAVID KRAMER:** Privilege ijo Speaker?

**SPEAKER KEDI:** Ilo kautej Mr. Minister, ne imaron ja lelok nan privilege eo.

Wonmanlok wot Senator Kramer?

**SEN. DAVID KRAMER:** Kommol Speaker. Im bed wot ilo ao kile im kautej aolep. Im ikonon jolok ao bod iben Minister e ak ne ella vote in jelke ne rainin, ilju kojean maron rol tok ne bebe eo an Nitijela in im kalet juon President ilju. Ak ikonon clear -e menin bwe eban bok juon allon, emaron bok wot juon wot raan.

Kommol Speaker.

**MIN. ATBI RIKLON:** Speaker, jemaron ke lale ta ne Jemen -Ei ne ej ba ikijen juon President kaal, 14 days lapse, eaikuj ella 14 raan mokta jen ad kelok juon President ne ejimwe ao melele ak enwot ao ba LC eo emaron tol koj ilo kajitok in.

**SPEAKER KEDI:** Wonmanlok wot Mr. Minister.

**MIN. ATBI RIKLON:** Kommol tata Speaker. Ne imaron read -I eon e naj konono kake mokta enwot ke jej konono wot kon vote in jelke in.

If the Nitijela has not elected the President at the expiration of 14 days after the date on which the President is so deem to have tender his resignation from Office, vote of no confidence and the tender of the President's resignation shall lapse 14 days, 14 raan, jeban kalete rainin, jeban kalete iliju bwe enaj rub Jemen -Ei in, total of 26 days.

**SEN. DAVID KRAMER:** Point of order Speaker?

**SPEAKER:** Ekwe point of order eo Senator Kramer?

**SEN. DAVID KRAMER:** Speaker, jej konono kon motion im ne an tan educate -I koj im tan komelele kon Jemen -Ei ne, ij tomak kojwoj melele kake im naj bar stand to bar melele eo iar letok ne Nitijela ebeke bwe jen rol tok ilju ne e-carry motion in, jemaron kelot President eo iliju. Ak ne Minister in emaron jout im stick wot ikijen issue ne ej ikijen vote of no confidence ne.

Kommol Speaker.

**SPEAKER KEDI:** Point of order ej in order. Wonmanlok wot ikijen debate eo kon nan uake un ko me ekar limantak enwot adean kar erra kaki kon vote in jelke eo. Ikijien interpretation of the Constitution, jenaj komane juon ien ne jej aikuj ak wonmanlok wot ikijen debate eo enwot adwoj kar erra kake.

Minister wonmanlok, ilo kautej.

**MIN. ATBI RIKLON:** Kommol wot. Naj bar stick nan interpretation eo an Section 7 paragraph 4 ilo Jemen -Ei e. Ij itok kio nan ao bok kwonao ilo motion in ebed iman. Letok jidrik ien nan ao organize -I paper kein ak ien eo wot konaj kabojrak io Speaker bwe ijab inline ak in order, ekwe am wot bebe. Ejelok an lojilnu kab kolmenlokijon likjab jen ke kwar ba enaj let etale. Ekwe tomak eo ao in im jenaj etal nan

let in bwe armij in aelon kein ren melele etke. Mol ke kajitok eo in rainin, ta eo eojake, jet kein un rar limantak ij lale juon ruo, e clear, kab bar jet un drikdrik ilo un kein rar limantak.

Im Speaker, ikonon jolok ao bod ibam bwe inne iar enwot lewaj bwe en kwe eo kwoj bed iolaplap enwot ao kar ba ke adjudication process an Nitijela in im kon kotmene in ke ijab lukin jela, kwoj bok kwonam ilo vote ke kwoj jab. Botab lukin naan eo ao ke ij ba kwe eo kwoj bed iolaplap im keronjake, ebed iben aolep ro rej bok kwonaer ilo vote iloan mwin. Im ej adjudication process eo an Nitijela in, enaj kwe eo aet ke, jab ke, ak bedbed ion un im erein rar provide –I tok nan koj, un ko kein. Im enwot ao kar ba inne ke eon in emaron bolen silence ak inem etke ear wor jidrik ien, konke ej kalikar ke eaikuj wor un im ij kamolol Senator rein motta ilo aer kar lemantak un kein. Im najj konono ijin konke ijab ba immanlok kab ijimelok, ejetet lok ao jeral jen aolep ak ij bok kwonaer enwot juon eo ear kate bwe en drelontok loan Nitijela in kon kojatdrikdrik in bwe enaj wor aenoman im kab jeral iben dron. Buromoj eo ao in konke ilak tobartok loan Nitijela in an aelon kein, ejetak juon lan kilebleb nae President in me jooj ar ronjaki al ko remman im speech ko remman im line ijone ilo line ko reaitok im iakiakwe pein im congratulate –I kon ta eo ear bok jikin ilo 4 raan eo.

Im enwot ao ba Speaker, komaron kabojrak io jabdewot ien elane kwoj lo ke ile ilikin mwieo in ilo konono kon vote in. Ak emman ao lale Jemen -Ei in im jele wewein an ejaak juon Kien elikin wot election. Elukin clear im alikar ta eo ej aikuj in bok jikin iman tata im eneo Speaker kem ar kelot eok im ta eddo ko am im ta eo enaj koman bwe kwon jako jen jea ne am, 22 emaan iloan mwin renaj koman bwe kwon jako ak 5 kio raan in am jeral ej emman wot ijab tomake ke inaj lemantak juon vote in ao jelke eok bwe ejanin menen jea ne am, kwoj kab tan komane ijo kwonam nan aelon kein, ejelok oktak jen ao tomak ke President in ejanin lon an opportunity nan komane ijo emaron komane nan kojwoj iaelon kein. Mekarta ne eon in ej konono ke jen vote im jeban ella jene, jenaj vote, ejelok menin bobrae, botab nan kwe eo konaj kaloloik eltan peim koman bwe President in en jako, ekwe naan kein arro nan dron.

**SEN. JOHN SILK:** Point of order Mr. Speaker? Jolok ao bod iben Minister in.

**SPEAKER KEDI:** Wonmanlok wot Senator Silk?

**SEN. JOHN SILK:** Speaker issue eo ne kon vote in jelke in nae Cabinet eo im President eo, ejab nae eok im eban nae eok bwe Jemen -Ei e emoj an komlot kalikar ilo Article V Section 7 kon konono eo an rainin im ilo ad cite -i unin cite –I article e jej cite –I ikijen Cabinet eo im President eo ejab Office ne am Mr. Speaker.

**MIN. ATBI RIKLON:** Mr. Speaker? Najj jab ba vote in nae eok...

**SPEAKER KEDI:** Point of order ej in order. Minister, jolok bod im ikijen konono kein enwot an Senator eo kwalok im enwot ao kar ba im ij bar eliji, ej aikuj bedbed wot ion uak eo kon vote in jelke in nae Cabinet. Im kole ilikin mwieo ilo kautej Mr. Minister ilo am jiton tok jea e an Speaker, lukin mol jea e an Speaker ejelok vote in jelke nae im ilo Jemen Ei ne enwot am bar cite –i Jemen Ei ne. Im jemaron ke bed

wot loan konono ko ikijen vote in jelke eo nae Cabinet, kab kon un ko ruo me rar ellajrak iloan document ne ebed iman mejam?

Jouj im wonmanlok wot.

**MIN. ATBI RIKLON:** Kommol tata Speaker. Im kautej point of order eo jen rutej eo ao jen Ebon. Im ekwe alikar ke inaj itok nan uake ak point nomba juon, im ijo elab an lorak meja ie e, ije me ej ba ejelok ilo bwebwenato, bwe an alikar aikuj eo ak mandate eo bwe en wor oktak ilo election, ejelok ilo bwebwenato. Im elane mandate eo in bwe en wor oktak, ekwe jete in oktak ear bok jikin iloan Nitijela in elikin election eo? Elane mandate eo in, jete in oktak jej konono kake iloan Nitijela in, ewor ke juon percentage? Public ear kalikar nan koj bwe en wor oktak ilo election? Armij in Ujae rar kelot io, ejab kon oktak eo bwe public ej mandate, rar kelot io bwe konke rej leke io bwe inaj tan koman wonmanlok nan Ujae. Im na ibojak in koman wonmanlok, ejab unin an oktak Ujae konke public mandate, ejab, ak naan in ijin me un in ej ba, en lon oktak ilo election. Im enwot elane ekar mandate eo in, inem en kar rikaal wot aolepen loan mwin, ejelok kajitok, elane jej bedbed ion naan in ke en lon oktak ilo election. Ekwe uak eo ao nan kajitok nomba juon bwe rej ba Marshalleses people express in the last election, ekwe Ujae people express change in Ujae, ejab loan Nitijela in, konke rej leke io bwe in iton koman wonmanlok nan jermal ko aer. Im Nitijela, Ujae ear jilikintok io nan ijin bwe nain bok kwonao im enwot kojwoj kajojo loan mwin, ewor ro eto aer bed loan Nitijela in mandate in ear jab jermal nan er, etke ejam jermal nan jet wot? Elane mol ke mandate eo an public in, so be it, en kar eindrein im jeban ba im ba public ej ba. Ekwe uak eo ao in, jolok ao bod ne ebod uak in.

Im uak nomba ruo, ke mandate or even a majority sufficient to a point of fully functioning Cabinet, emoj an Jemen Ei eo kalikare wewein an juon Cabinet function. Ke ear jijot tok President in ewor wor ruo eddo ion, nan make sure ke Cabinet ej function, ewi wewein? Koman bwe en wor 6 Cabinet member, 6 Cabinet minimum inem enaj function Cabinet. Ijoke ewor tore iumin 7 raan en function Cabinet eo am otherwise jenaj kar vote enin Section 7 ej walaltak wot im ba ne kojab inem enin kojean naj kar komane. Ak enwot an President e kar ba emoj an satisfy –ik aolep requirement ko an Jemen -Ei in elab tata minimum nomba eo bwe en function juon Cabinet. In fact ear likit ilo 8 jonan an satisfy –ki kar requirement kein, ewor juon bar nomba ijone joj jela 10, ijoke ejelok an time frame, jabdewot ien komaron in kanne botab lale kwar ella jen lal in 6. Im LC eo ne ijone, AG eo en jon erro naj bar komeleleik koj, im aolepen men kein ibawot emoj aer satisfy. Mol ke ewor ruo portfolio ko rejanin lon kobaer botab ejab ba kwon kanni wot kio, ebar wor eon ej ba elane kojab inem kwe make konaj assume responsibility, his assuming responsibility im kio ta eo ejorren ekomane?

Imaron in ba nan Nitijela in im jolok ao bod Speaker, ej kab ruo dre agenda, official agenda an Cabinet, ruo im komean ar engage ilo iben Ministry ko woj enwot adwoj kijon komane, ejab jilu, juon eo agenda ekar jilu ak ejab im tobar jilu konke eitok vote in jelke in. Im iburomoj bwe ejanin lon ien amean opportunity nan amean baj lale ta eo komean maron komane ak eitok vote in jelke in. Im kio jean ej, emoj adean bar ba ekkein lok jidrik ke jej jermal enwot Kien democracy im Kien democracy ej involve due process, elon due process ilo Kien democracy jekanoj jela, kotlok elab ien, komean lak kajitok, ekwe rainin ealikar. Im mol ke nomba menkein im rej control -e juon ien ak ebar lon due process nan koj. Im



Mr. Speaker, na ikonon kwalok ao kile eok enwot ke ej kab kein kajuon in ao bok kwonao ilo konono kein an Nitijela ilo session in ekaal, lewaj ao naan in kile eok im barenwot Office eo an Vice Speaker eo im nan President in ad kab enwot aolepen Cabinet member rein mottan, im aolep ribebe rein ilo jikin bebe in an armij in Majol, Iroj im Leiroj ro ad barenwot ro otemjej me rej libjorjore im lolorjake jermal ko reaurok bwe armij in Majol ren emman jokkin aer mour, im aolep armij in Majol.

Mr. Speaker, naj bok kwonao ilo jibbonin rainin bwe elon melele ko jaar ronjaki ilo raan ko mantak im elab tata ilo raan eo inne kab rainin ikijen ta in me jej komane rainin. Ebwe ao buromoj bwe ij ron naan kein ke menin jej komane ej rubrub, ak ijela ke koj woj melele, koj woj rikwelok koj woj melele im ikonon kakememej kojean bwe jermal in kojean ej komane jej komane ekkar nan an komlot iumin Jemen -Ei eo ad. Im ikonon kajion komeleleik armij in Majol ke menin jej komane ilo kio enwot vote in jelke ejab jermal in rubrub, ilo ao watoke ej juon jermal eo nan ad bukot mejlan bwe en emman lok im momman lok service kein an armij in Majol nan er jen kojean loan mwin enwot ke rekar kajijot kojean loan jikin bebe in aer. Im kojean ej exercise -I ial in me ej komlot ilo Jemen -Ei in, elane jej loe ke ejelok leke ilo Cabinet eo inem jej kojermal article in me eto ad konono kake ikijen vote in jelke. Na imelele ke Jemen -Ei ne ej ba emaron 6 Minister bwe en maron function juon Government ak ilo lukin ilo mol eo bwe ewor ruo ministry ejelok aer minister nan rainin im ebar mol ke President eo emaron assume I responsibility ko an ministry kein ak lukun mol ke emaron fulfill I aolepen men kein jillu (3) ke? Oppij eo an President, Ministry eo an Health, im Ministry eo an jikin jelalokijon? Naj lomnak ej juon menin ad exercise I maron in umin Jemen -Ei in bwe jen koman bwe service ko nan armij ren bok jikier ilo ien eo emokaj einwot aer melele ke money kein ad im maron kein ad redrik, im jejjab aikuj karumijmij kaki men kein. Jej aikujin wonmantak ilo ien eo eman, ien eo emokaj bwe armij in Majol ren bok leen einwot ke ekkar bwe jen jermal nan er im lelok service im mour ko reman nan er. Im jej konono kin manit im konono kin kien ak ikonon bar kakemijmij armij in Majol im bar kojean, ke kien in ad ej bar koba lok ippen lal ko ibelakin lal in. Im kien democracy ej kotlok bwe armij ren ekalel, im kajejan in iloon mwin armij in Majol rar kalet kajejan. Ijab tomak ke ewor juon iaad iloon mwin, ian Nitijela rein rekonan rubrub im rekonan bwe en jab jeraman armij in Majol. Kijwoj ej kate kijwoj bwe mour an armij in aelon kein ad ren emanlok botab Jemen Ei ne ad ej bar kotlok bwe jen komane einwot ao bar ba, ke vote in jelke ej juon instrument nan kakomanmanlok service nan armij, ejab nan rubrub. Iburmoj bwe jej ron ke jej kojermal menin nan rubrub, ilo mol ilak lale ej nan kakomanmanlok, ej letok maron eo nan kajejan ribebe im lale ta eo aikuj bok jikin bwe en eman. Ilak watake menin ej exercise democracy, kien anemkwoj. Im kien anemkwoj ej kotlok bwe aolep armij ren komani jokalet ko aer im ribebe rein ren bar komani jokalet ko aer, emoj manit im government ewor ien rej etal im ewor ijo jikier im ewor ijo jikier jen dron.

Exercise in iloon mwin jej kojerbale exercise -I Parliamentarian System, rebeltan jermal ilo Parliamentarian System iumin democracy. Emol ke jenaj kautej manit ilo ijoko rekar, unin aer differentiate -I manit im government, kinke government im manit reoktak jen dron. Relukun oktak elane armij in Majol renaj lukun ereimanlok. Im enin kajejan ribebe kajejan ej exercise, kajejan ejab aikuj impartial im ba ooh, kinke manit ej ba; ak kien democracy ej ba? Im kajejan ribebe kajejan ej lo ke eman, enin jej exercise -I oktak kein ruo ikotan manit im kien anemkwoj. Ejimwe ke jermal kein ruo roktak jen dron ilo jet wawein ak rej bar interlink ilo bar juon wawein; elon ijo rej ekejel ie. Kio kajejan ej jijot iloon

mwin kajejan ej jijot kin kien anemkwoj, kajejan ejab jijot kin manit. Manit eo ear jab likit kajejan nae ijin, armij ro rar exercise -I maron eo aer umin Jemen Ei bwe ren anemkwoj in kalet ro rekonan bwe ren jermal nan er. Im enin kajejan ej komane process kein, rebeltan jermal kein me jej loe, kio ej jet wawein reman ak jet wawein remaron bolen jab lukun jejjot. Im ij kajitok ippedejan bwe kajejan en komane kalet kein ad ilo mol, ilo ad jab eliklik, komane ta eo kwoj loke ke ejimwe nan armij in Majol im komane. Naij jab tomak ke ejimwe menin bwe en ejelok minister nan education im jelalokijon iumin ien eo aetok. Kajejan ej kojerbal naan ne "Kajur wot, Wor" im kajejan ej bar itok nan numba, kajejan ej ba un ne numba. Ak unin adejan bed iloan mwin aolep numba, rikonono ro lok mokta rar bar kwalok im naij bar kamejlok, kajejan ej kojerbal "Kajur wot wor" ijoko kane me manit im kien remaron wawa ioon dron. Manit kein ad ej ba "Kajur wot wor" kien democracy ej ba majority rule im ijoko kane me elon jet jikin manit im kien remaron ippen dron ie ak ewor jet ien principle ko an manit rejjab apply nan kien democracy. Koban etal wot im komane juon meneo me enaj jelet maron im jimwe ko an juon armij kinke manit ej ba. Im naij jolok ao bwod ippen jabdrewot rironjake ne renaj loe ke inaj kainebataik er kin melele kein ao, ak naij kojerbal kien anemkwoj im kwalok aenikio ilo ta eo naij kile ke ejimwe. Kommol Mr. Speaker.

**(KABOKBOK)**

**SPEAKER KEDI:** Kommol Senator, Senator eo ad juon jen Mili Wilbur Heine. Im President ear kajutak pein, Excellency President? Ej yield floor nan In Assistance to the President, Minister David Kabua, wonmanlok wot.

**MIN. DAVID KABUA:** Kommol Mr. Speaker. Im bareinwot kamolol President kin an yield floor nan ao wonmanlok wot. Moktata ikonon lewaj juon ao kile im kautiej komwoj aolep iloan mwin, im aolepen Iroj im Leroj ro ad ijoko otemjej ibelakin Majol im ilikin Majol in, im aolep armij in Majol.

Mr. Speaker, ne enaj rolok jidrik ad konono, kwe ne ilo jilla ne naj lor karok eo am. Naij itok wot nan ao kwalok wot jejjot ao baj kalamenlokijon ikijen elemakwot in ak reason in me ear wonmantak ikijen vote in jelke eo nae President im Cabinet eo an. Ak moktata ikonon kareilok kajejan im kenaan ikijen kar uak e me allegation ka ear itok, ej einwot ke jar kajitok kar unleplep in kar walontak vote in jelke in bwe jar jaje ke ej kab jedetok ilo raan ko kio rej motlok. Ejoj naij baj lale jinoin mene, jinoin an wanlontak statement e aer rej kwalok ke; einwot jarjar in ear walontak ikijen rej cite -I election eo ear jemlok im kwalok ke konan eo an armij in Majol ewalok ilo election eo. Im mol ke konan eo an armij ear walok ilo election eo iloan lon, ej kab bolen wor juon ien elukun bool rikaal tok nan iloan Nitijela. Ak ejab address -e administration eo an President Nemra, ke ejanin jutak ilo torein.

Im meneo juon ij bar ereitok im lale ikijen paragraph e tok ilal kein ka-ruo ej kwalok ke ej ba einwot ke lal in ad eaikuji juon kien eo me, ejab aikuji juon kien eo me emojno im ejelok men ejela komane ekwe juon in bar kaburomojmoj ije ij bar loe; ilo menin bwe ejja mene me rej base -i kar ak jen ba uaak ko ilo ad kar kajitok ewi wot kar ground ko ikijen an kar walontak vote in jelke in, emoj elak walok lontak men ka; juon e men ij bar lo ke ekaburomojmoj ao lale kinke ejanin kar bar jermal government in an Nemra ilo ien in ear walontak menin. Einwot adejan jela ke ejanin menen jea e an President e, ej kab ijino im kin naan kein im ba emajno government eo an einwot ilak lale ejab; kajejan kenan rot in einwot kajejan ej kenaan in aituwerok e dron im le kilan baade im meneo jelukun jab monono kake in. Adejan kilan le

baade im tarinaeik dron ak etto ao kar bar jino ao itok im jino jermal ilo Nitijela in iar ron naan in jermal ippen dron ak elukun; ijaje ta in ebin ilo adwoj jab jermal ippen dron. Ak armij in Majol rej reitok im kalimjok kojean im kalamenlokijon eita Nitijela ke aolep ien kajejan ej itok im iakwelelel kin bar jet men ak ejelok wonmanlok. Im jean aikujin karejar ippen dron im jermal ippen dron nan kowonmanlok armij in Majol im aelon kein ad.

Im juon e men ko ikijen ba bar kien in ej ineffective, naan in "ineffective" ej einwot juon kajin belle ej ba ejelok menen emaron komane, emoj unin ao bar ilbok jidrik kon an wanlontak vote in jelke in, ilak lale elukun baj jidrimkij an jede lontak ejab kinke imijake menin bwe ijab mijak vote in jelke, ijab kea im ijab kenaan kinke ij bed ilo Cabinet e an President Nemra, bwe ejab priority eo ao bed ilo Cabinet, priority eo ao nan ao kar itan jermal im jiban armij in Majol. Emoj elak walok melele rot in einwot ejab eman kalamenlokijon kake, ekwalok nan io ke kojean lukun ban jermal ippen dron, ejanin jino wot Nitijela in ak kajejan jino tarinaeik dron bwe juon in bar kaburomojmoj elukun nana. Im armij rein rej ereitok im en bojrak adean ba public ej ba, public ej ba bwe armij, elon naan rej ba "mejed kabilok koj" rej reitom lale adean jermal.

An bar ba "ineffective" administration in an Nemra im mokaj im lelontak motion in nan kajijot lok, ebwe an, unin ao ba ekaburomojmoj, ekabulonlon im ejab nan koj wot im armij rein ad ak lal ka woj me mottad, retelok ilbok kin menin bwe ej kab moj ad kabit im kalek juon kien ak ejanin lukun itan jino jermal wot ak jebar itok im kabojrake. Im juon in naj disturbance ak bojrak ilo jermal im wonmanlok ko an government nan Majol; juon ne kotta an bojrak ak kojean jela ke emoj an dret ne kio drindrin in mejlep ne tobartok aelon kein. Elon aelon emoj aer letok eowar im kajitok ko aer kin jiban ikijen dren im elak itok nan, ej kab itan jino jermal administration e an President in, ear itok kajitok jen Aur kin dren emokaj im jilikinlok, emoj an etal RO Unit nan Aur, eitok bar enaan jen Mili emoj an bar etal nan dren nan Mili. Im ijaje ia in kajejan ej ba "ineffective" government in kake ak ej kab iton jino jermal. Baj ne jean ear jab ium im komane menin bwe ej naj wonmantak wot vote in jelke in, bwe emoj an file ej naj wonmantak wot, ne jean ear bar kalamenlokijon jidrik kin joran in ejelet aelon kein, im kotar jidrik bwe en ejelok bojrak ak jen mokta lale im address -e joran in bwe kio emoj an madeoneonlok marro ne im ejelet kio elonlok jen aelon ka. Emoj an itok enaan ke aolelpen Kabin Meto ne ejoran, ettorlok nan Likiep im tobtoblok nan Mejit im bar jimatanin Ailinglaplap raan ko lok ak jejab jela raan kein manlok, ak kajejan ej kab bed ilo January ak ewor enaan ke drindrin in mejlep ne emaron tobarlok jemelokinlok summer in ak emaron July im August. Im komean ej lo wot Majuro in ebar drelon ilo joran, Majuro in ak ijo me elontata armij ie in im jikin dren rej bed ie ak emoj an alikar ke emora Woja, emora Ajeltake, kolak reitok e-brown wujjoj kane, ak January menin.

Ekwe jet kein men kajejan aikujin bar kalamenlokijon kaki im jiban dron bwe jet kane joran kijon rej.

**SPEAKER KEDI:** Ewor ta ijone Senator Wilbur Heine.

**MIN. DAVID KABUA:** Jolok bwod ak ij baj ba kin men kein ij kareilok kojean kin adean ium im wonmantak kin menin. Ak einwot ao ba, ijab lukun kar erra ilo an kar wonmantak allegation ka ilo wawein nememe e aer, baj ao make kalamenlokijon; en ba na ibojak in jijot lok jabdrewot ien ak meneo ne iburomoj kin aelon kein ad im armij in Majol. Kommol Mr. Speaker.

**SPEAKER KEDI:** Kommol Mr. Minister. Senator Heine, ewor kar point ippam ijone, komaron ke wonmanlok wot mok?

**SEN. WILBUR HEINE:** Eman kommol Speaker kin am bar letok jidrik arro ien. Naj lomnak ebwe an let komelele ko jar komani mantak ikijen motion in jelke ne, naj kajitok bwe jen wonmanlok wot im vote.

Kommol Mr. Speaker.

**SPEAKER KEDI:** Bar juon motion nan kiil debate, emoj second -e. Im mokta jen ad entertain -l motion eo nan kiil debate, inaj lelok opportunity eo nan Minister Note, bwe en wonmanlok wot im bok kwanan im elikin jemaron bar lewaj nan bar jillu im men im jenaj kiil debate elikin.

Wonmanlok wot Minister Note?

**MIN. KESSAI NOTE:** Mr. Speaker elane, inaj lelok nan bar jet Senator ak Minister bwe ren bok kwonaer innem naj yield floor ne.

**SPEAKER KEDI:** Im ilo torein, kommol Mr. Minister, inaj kile Minister Bruce Bilimon an R&D bwe en wonmanlok wot.

**MIN. BRUCE BILIMON:** Kommol, kommol Mr. Speaker. Bed wot ilo aoo in kautiej eo an kwelok in ilo jibonin, kautiej Iroj im Leroj ro ad, kautiej eok Speaker, Mr. Vice Speaker, President, Cabinet, Senator rein im elaptata kautiej armij in Majol. Eman melele ko jej ron im mol ilo manit ekka ad kijon kojerbal naan kein "Lejmanjuri" ne ej itok nan mij jekijon ba "Jadrikdrik Jaranmij, Jouj eo Mour eo, Enra bwe jen lale rara." Im ne ej itok nan kien mol democracy im men kein ak ne melele ko an ri Majol, ekka wot ad ba Nitijela, ne jej itok nan ijin relax ennini kijwoj ri Majol rej ba Nitijela in. Im "Nitijela" ilo ao melele, ej ijo me aolep jela rebed iloan, jela komaan wa, jela karejar, kwaan jela, im emaron kwaan jela ne ilo facebook bwe jelak lale einwot ej jutak likin vote "jaab". Jela kautiej dron ak eliktata im ejab driktata, ilo manit im ilo jermal in kien, jela iakwe dron.

Naj ron melele ko reman ak eoktak jidrik ao kalamenlokijon ilo ad kojerbal Jemen Ei ne bwe mol ilo spirit ne an Jemen Ei ne ej komlet ke emen (4) emaan remaron bok mantak juon vote in jelke. Im mol menin ejimwe ilo ak kajitok eo ao in, ej integrity ne an unin an wonmantak vote in jelke ne. Ne melele eo in bwe kijwoj ej ekal im ej ekal menin vote in jelke, emoj ij baj kalamenlokijon ibba, etke jar jab komane vote in jelke jen jinoin Nitijela tok nan rainin? Elane ej juon ne tool im elane juon ne vehicle im juon ne method nan koman ekkal, lemanlok, etke jejab kojerbal.

Mr. Speaker, driktakin Nitijela einwot an alikar ilo kar ekalel eo kio rebed iloan ijin, enin ilju im jaklaj emoj an kobatok ippen wisdom eo me an Nitijela elaptata rein me rar bed jen jinoin me etto aer bed ijin. Im elap ao buromoj ne baj na eo, ne ij drelontok bwe konan eo ao iar konan itan bar jermal ejelok otkak jen aolepedean. Im ikar bar einwot konan itok bwe in ekatak jela, naan in "jela" jela iakwe, jela kautiej.

Im Mr. Speaker, iburomoj bwe jermal eo jinointata itok im ioon e enne me kajejan ej ioon e rainin im iban komeleleiki bwe aolepen armij rein im jela ta in jej komane. Juon im juon emaron uaaki ippen make ilo tumulalin buruwon, jemaron ba menono ne an einwot juon ri Majol, ej ke menin ekal menin?

Eman adean kojeral numba, ke elon jet numba jekijon ba lucky number, ak elon jet numba jekijon ba not lucky number im elon wawein numba, elon. Emoj ne juon numba enaj kwalok ilju im jaklaj eo nan ritel ro rainin me redriktak in Nitijela ke numba eo io nan lemanlok juon vote in jelke eo me ejelok bedbedin ak kinke numba, bwe ij kalimjoklok ke ilju im jaklaj ne enaj ejelok oktak kalamenlokijon e ne baj komean eo me komean ear itok ekatak, komean ekatak men kein me numba kein me imaron wataki baj kojerbale ibba make ejab ilo jimwe bwe ejelok bedbed, kobban etal nan court elane ejelok ruom; reban na ruwom elane ejelok ruwom.

Ij drie melele ko an President, ikonan kamolol e kin naan ko an. Mr. Speaker, ilo ao melele bwe etto ao jeral ippen kien, ewor jillu (3) ra ko ilo Republic of the Marshall Islands, Ra eo juon enne ippam, enne ippam Mr. Speaker; ra eo me ej koman kien nan armij in Majol. Ra eo kein karuo, ej enne me jikin ekajet, me elane elon ruwom, ekwe enaj ba ko-quilty ak ne ejelok ruwom kobar rol im jeral, naj lewaj am opportunity bwe kwon jeral. Im ra eo kein kajillu, ej enne me President e ej jijot ie im Cabinet ak ekka ad ba "Executive", ebwe ao buromoj ke ij ron ke rej ba weak government kinke ejelok an mandate ilo Nitijela, ta mol ke ne eitok baj juon lal kaal ilju im jaklaj im ba ej letok jubbuk (100) million nan baj waan jonok nan ippen Nitijela im kajeen ej aikuj komane ilo through legislation? Ta mol enaj wisdom eo an Nitijela kinke ejab bed numba eo enaj lelal lok armij in Majol im jab kadrelontok jeraman kein kin numba?

Mr. Speaker, elukun alikar ke ilo jibonin rainin ewor wot ruo jokalet ko jaikuj komani im mol ke rej ettor kin numba. Ijoke mokta jen ao kwalok naan kein ruo, na ikonan kwalok ilo mol im ilo etta ke aolep rikwelok rein ijin elap ao kautiej er im ejelok ao rikojdret ilo ao jijot ije, naj monono bwe ij jijot einwot juon rikwelok, eo me emoj an rainin kobatok ilo Nit-in-jela in me kojean aolep kojean ej jijot ie, ilo etan iroj ro, ilo etan armij ro. Im statement e eliktata naj loe ilo leta e, ej ba "it is time to do the right thing now" nan ukwot tok nan kajin Majol bwe kijwoj en melele, ej ba "tore eo in kio bwe jen komane ta eo ejimwe" jokalet eo ej am. Ak jokalet eo einwot ao kar ba ruo mwenan; juon nan drijo im ukwoj, lemanlok aelon kein, lelok opportunity nan ro me ren jeral im; ruo ekwe komelele, ijab aikuj ba bwe jemelele. Kajitok eo ao in ikonan kamolol eok im kautiej aolep rikwelok rein, kwalok ao kautiej er aolep, ejelok juon en naj nirbokat, elon ijela kajer, nukku ilo juon ak ruo wawein, atartar drinkat.

Ekwe naan ko ikar konan baj kobaiktok ak einwot ao ba Nitijela in, ejela ta eo ej aikuj komane ilo etan armij in Majol. Mr. Speaker, kommel kin am letok jidrik ien bwe aenikien Maloelap en wonmantak ilo ien in. Kommel tata.

**SPEAKER KEDI:** Kommel Mr. Minister. Im ilo torein inaj, enaj ewawein ad kojeikiki nan ne ededelok nan elikin Minister, inaj bar kojeblak nan baj Senator im elikin jenaj bar kojeblaktok nan Minister ra. Im inaj kile kio Senator eo eutie jen Mejit, Dennis Momtaro, wonmanlok wot.

**SEN. DENNIS MOMOTARO:** Kommel Mr. Speaker. Im Mr. Speaker, ij bed wot ilo ao kile im kautiej muktata jemed ilan, kautiej kwe Mr. Speaker kab Vice Speaker im Mr. President, aolep Cabinet Minister rein, aolep Senator rein rej bed ijin. Ikonan bar lelok ao kile im kautiej Iroj kab Leroj ro ad ilo mweo mweir im aolep ro belakin Majol in. Kile aolep ro me rej ronjake kwelok in ilo jibonin rainin ikijen Vote of

No Confidence in, kile ro ilo Majol, ro ilikin Majol im ikonon lelok ao kile nan aolep likao rein kab jiron rein, kora rein jined rej bed ijin ilo jibonin rainin ak elikin raelepen rainin.

Mr. Speaker, mokta jen ad kar itok nan lal in emoj an Anij dreore ia ko jej bed ie, emoj an kalikar kwe, ro jinom kab jemom ro, ro naj jeim kab jatim ro, ro nukum ro ak ro wulepam ro, aolep kadkad kein emoj an litok nan koj im ennin kojean ej bed ijin, kojean aolep ewor kadkad nan ippen dron. Im juon in men ikonon bwe kojean en ememije ej letok jen Anij im ejelok en enaj bok jen koj, kautiej aolep.

Mr. Speaker, mokta jen ao lemantak jejjo naan kein ao, lukun ilo mol kajitok men ka. Ikonon naj lewaj tumokaj in ao jolok bwod nan jabdrewot ne baj wor naan ko me inaj limantak me reban kabononoiki an ro jet ronjake, elaptata koj, kojean ilo rikwelok rein me armij rar dror e kojean ijin.

Jar ron ekeinlok ikijen naan eo me elukun emejaja kio ej naan ne "numba". Im naj baj kalamenlokijon kin naan in kinke kio naj lale elap wot ba ke ne ejab bed numba eo ippam kio, koban komani ak lemanlok jermal kein an lal in ad. Im ij baj kalamenlokijon Mr. Speaker, ne baj komean eo kio im ne jenaj baj bed im minority ak jabdrewot eo enaj bed ilo minority ak mona eo juon me eiet uaan, ne jebaj itan lemantak bill ak resolution ko me jar ron kaki im kinke ej itok en komean eo me enaj iet, ekwe jokdron ne renaj eman men kan nan ippen armij in Majol ak ta ro me elon uaer renaj kakure ke? Kinke numba ke? im ij baj lomnak kin wawein in. Kar naan ko me Mr. President, ear lukun baniji ilo ien eo me ear konono ej ikijen jermal ippen dron im na ilukun tomak ilo jermal ippen dron, unin adean itok nan ijin in kojean en itan jermal ippen dron nana adean bukwoti ta ko renaj eman nan armij in Majol kab lal in ad, ejab nan kojean ak nan armij ro bwe armij ro rar kajijot koj ilo jea kein me kojean ej jijot ie ilo rainin.

Meneo juon ikonon bar koman kajitok kake ej ikijen juon kalamenlokijon eo me elukun eman ear itok jen brother e ao ikijen an konono kin better services. Im kajitok eo ao administration in an President Nemra kab Cabinet in rejanin baj jijot ilo jea ne ak jeba ke rejjab koman better services ke? im kajitok eo ao in einwot ne baj ium ad lemantak im ba better services ak rejanin baj komani jermal ko aer, rej itan jino jermal ak jeba ke probably rejjab koman better services ko me reman. Emoj baj kajitok eo ao bar juon in, einwot elukun baj ium ad limantak men kein.

Im ikijen bar numba jekar konono kin commitment im ilo kar raan in kar 4 raan eo ke kojean ekar vote, ekar alikar kar numba eo ear bed ippen Mr. President. Ak rainin jeburomoj bwe einwot ao konono kin commitment ekwe, ewor jet rar einwot etal jen commitment ko aer. Emoj eindrein jejjab blame -I juon im juon bwe eindrein koj kajojo ijin jej komani decision ko ad, einwot aer kar armij ro leke koj bwe jen itok im komane decision ko ijin. Ak meneo ij bar ekol kake in ne jenaj itan koman commit im jokdron ne jej loke wawein kan rejjab jimwe, ak kinke emoj ad commit, ekwe jen lori wot ke? Kajitok eo ao in Mr. Speaker. Ejab to kar week ko lok kojean ear bok kallimur ko iman mejan Anij im iman mejen armij in Majol, ke kojean naj kojerbali oppij kein adean nan lemanlok im kakomanmanlok jokkun mour nan armij in Majol im naj miss -I juon ian naan ko ej "ejab nan personal gain". Im na ikonon bar kakememije kojean kin kalimur in bwe elukun lap, naj tomak juon ian menko me jej aikujin lukun kalamenlokijon kaki ikijen ne jej itan kojerbal nan personal gain ak einwot nan kojeraman koj make.

Mr. Speaker, naj lale pepa e me ear walontak Motion of No Confidence e im jar ron manlok ej kwalok ilo juon ian sentence ka ej ba "weak and ineffective government" im ne baj na eo personally, ijjab erra ilo

etan allegation e kinke einwot ao kar ba manlok President Nemra kab Cabinet e an rejanin komani jermal ko aer ak jeba ke rej weak im ineffective. Weak ej “majno” ilo kajin Majol, ineffective ej einwot jab maronin komani jermal ko. Ekwe einwot ao ba Mr. Speaker, ijab itan kar koman statement, ikonan wot lemantak kar kalamenlokijon kein elaptata kajitok kein nan kojean bwe kojean en lomnaki im ijo wot me kojean naj vote ie, enaj baj alikar ak vote eo ao Mr. Speaker, iar kwalok inne einwot ao kar kajitok bwe ne in kar maronin excuse nan ao kar etal nan kar kojeraman eo an armij ro, kojeraman eo an local government eo inne. Emej naj bed wot ilo tomak e ao ke let’s give administration e an Casten, President Casten Nemra kab Cabinet e an a chance, im ne jejab ekwe kojean in me kojean ej bed ijin. Ekwe kin naan kein jejo wot Mr. Speaker, ij lewaj ao naan in kautiej aolep im kojeraman aolep im bar juon alen jolok bwod ne ewor jet naan ko me erolok ao kar ba. Kommol wot Mr. Speaker.

**SPEAKER KEDI:** Kommol Senator Momotaro. Inaj kio kile MInister Alik-Momotaro.

**MIN. DAISY ALIK-MOMOTARO:** Kommol Mr. Speaker. Muktata ij bed wot ilo aoo in kile eo im kobalok ippen rotemjej me rar kwalok naan in kile ko aer, likit jemed ilan muktata einwot ke ej imantata, aolep armij rotemjej rej kein karuo einwot ke rar likit kojean 33 iloan Nitijela im kojean eliktata. Ikonan lelok kile eo nan President Nemra, aolepen Minister rein motta, Iroj im leroj ro ad ilo aelon kein, koba ippen rikaki ro jen kajojo eklesia ko ro karejaraer rej jiban er. Kile eok Mr. Speaker, Vice Speaker im aolepen member rein an Nitijela. Naij juon eo me naj tomak ilo kien anemkwoj ak democracy im elap ao monono im kamolol kin Jemen Ei in me ro imanlok rar komane, im elap ao monono kin maron in rar letok nan koj bwe en wor vote in jelke. Na juon eo ebar kaal tok nan Nitijela in im naj ekatak wot im iar koman jidrik ao ekatak ikijen vote in jelke ko moktalok ak iar loe ke enanin aolep, ejab enanin aolep ewor aer bedbed, ejab juon ak ruo ak elonlok. Kio buromoj eo ao in einwot an walok ijin man, widin jidrik wot ak juon ak ruo unin in vote in jelke in nae President Nemra. Einwot juon ian rikwelok ro jen Jaluit, iar konan bok jidrik kwonao bwe en walok ilo, en lolo ilo journal kane an Nitijela, elaptata armij in Jaluit ren ron aenikio, ia eo ij bed ie. Im elap ao tomak ippen rikonono ro me rej imanlok me rej support e, rejjab rie vote in jelke in kin un kein, einwot an alajrak ije.

Un numba juon, ej kwalok ke ilo mandate eo an ri Majol ilo oktak in ekalel eo Nitijela eo enin jaar loe, ebol armij ro roktak, ao kalamenlokijon ilo ao kar kate io ippen President Nemra, he represent change, oktak. Juon eo me ej iwoj in naj kar bok jila ne ilo aelon in Majol in ilo juon eo me oktak, ej itok im emaron kar itan kobaik koj einwot ilo kalamenlokijon aolep ien Nitijela ko manlok, jemokin ron akwel ikotan baade ko ruo. Ke ekar itok Nitijela in ij kalimjok Nemra einwot juon eo me ej itok jen juon group eo me independent im emaron kar kobaik kijwoj aolep. Im naj ba Nemra ej represent -e change eo me armij rekonan, oktak.

Im kein karuo ilo vote in jelke e ej konono kin ineffective government, kajin belle ilo baj na ilo ao kalamenlokijon im interpret -e ak ukwot e naan in “ineffective” einwot juon eo me ejelok ta, ejelok an meneo eo ej komane. Im kio naj ereitok im lale calendar e ije Nemra, ear elect ilo 4 raan, 11 raan ekar kojeraman Cabinet eo an, 14 raan widin 3 wot raan jen raan eo me Cabinet eo an ear kojeraman, e -file Vote of No Confidence. Jen toreo einwot juon eo me ekal tok nan Nitijela in iar itok kin kalamenlokijon eo me naj itok mene ij represent -e wot armij in Jaluit, ij itok in kate io nan armij in Jaluit. Im ke rar likit io bwe nain Minister, ibojak in jermal nan aolepen armij in aelon kein ilo ejelok kalijoklok, einwot juon eo

me ej tomak ilo jermal ippen dron. Im menin iar jironlok ladrik ro neju im jatu me rej kaal ilo group eo amean, mene jet iamiean rejab bed ilo Cabinet eo ak na ibed ie, ibojak in jiban im ronjake aikuji ko amiean, an aelon ko amiean ilo ejelok kalijoklok. Kio einwot ao ba jillu (3) wot raan ekijkan ad maronin function kalamenlokijon ko ad ke ami iwoj im jebtake tok koj? This is how I see the interpretation of the vote in jelke, ao make, jolok bwod ne eddo ippen ro jet.

Kio jej kalamenlokijon im kwelok aolep raan ko mantak, kottar enaj itok naat motion in, ta kein me rej na ruwod? Jonan jekajitok ippen dron, kwar koman ta? Ne baj na, juon eo me ekal Minister Leander, ewor men kwar komane ke, ke kwe Minister Bruce? Ladrik ra me komean kaal tok jen je, einwot jonan ad lukun wiwijet im jab jela kin menin, ak kio enin ej jedetok ijin, men kein ruo (2). Iar kajitok ibben senator eo jeiu me elap ao respect -e jen Ebon, brother ta vote in jelke en? Eba ejanin wor, ibba ekwe enana, jenaj kojjo juon kijek eo me jebab konan kojjo. Emoj buromoj eo ao ij loe ke aurok bwe in bok kwonao im kwalok aenikio bwe armij in Jaluit ren ron ia eo ij jutak ie einwot ke rekar lukun celebrate im loe monono ke President Nemra ej head e jila ne an aelon in Majol in. Im kim ear bar kalimjoke einwot juon eo me ej represent change ejab nan aelon in Jaluit wot ak nan aolepen armij in Majol. Mene ilo kalamenlokijon jemaronin ba ekaal bwe ekaal nan iloan Nitijela in, ak ilo kalamenlokijon jermal ko an einwot juon Chief Secretary, e eo me ej kattor I jermal ko Cabinet eo ej komani. Einwot ke ej jijot ippeir iumin yio ko me ear jermal einwot juon Chief Secretary im ejab kaal, ejela jermal kein im enin naj itok nan wot ao kwalok ke, vote eo juon an aelon in Jaluit, ej kwalok kinke ejelok bedbed. Iar bar kwalok eman vote in jelke ibba, naj tomak ke ej aikuj wor bwe ej letok maron eo nan armij bwe jen wor ad maronin kabojrak jermal ko me rejjab jimwe im jejjot. Ak wawein jokjokin an kar itok ej jen not even 2 weeks elukun ejab eman, kojean ej einwot ao ba jino juon kijek eo me enaj monane im enaj lukun bin an wor jermal ippen dron. Kin naan kein reiet, ikonan jolok ao bwod ippen jadbewot ne ewor naan ko ikar kwaloki me rejjab ekar, ak ien ad kwalok kalamenlokijon ko ad im bed wot ilo aoo in kautiej aolep im Anij en kojeraman koj im Marshall Island. Kommol.

**SPEAKER KEDI:** Kommol Minister, kora eo juon jined iloan Nitijela in, ijelokin kora ro ruo (2) jined. Inaj lelok kio ien in nan Senator Silk bwe en wonmanlok wot im elikin inaj bar kojeblok nan bar juon Minister, wonmanlok wot.

**SEN. JOHN SILK:** Kommol Mr. Speaker im bar juon alen bed wot ilo aoo in kautiej eo nan kijwoj aolep, eban kanuij aetok ao konono bwe ijela ke bolen ejoran aenikio ak mic e eman. Ak Mr. Speaker, ebwe an to adean konono kin issue in ak issue in elukun simple im enneo Mr. President make ear ba “numba” im jet iadean iloan mwin rar ba “numba”. Im wawein; jolok bwod ne enaj bin adwoj melele ak wawein democracy eo in me jej bed ie kio, parliamentary system kwoj rule kin numba, kwoj government, kwoj bok government eo kin numba. Im kwoj run -e government eo kin numba in role ilo Nitijela eo, parliament bwe kwon maronin fully functional, kwoj aikujin kojerbal numba. Im imaron baj quote -I waj juon naan jen juon ian ro me ebwe aer kabel ilo im of all places, China ilo ien ko etto “Confucius im Confucius ej ba ilo ao read -I tok kajin English e im inaj ukwote nan kajin Majol kab jolok ao bwod. “Confucius ej ba there are three elements essential in the matters of the state” inaj kwalok ta kein; “ ej ba ewor jillu (3) men ko raurok ilo juon lal, ne kwoj handle -e juon lal; 1) ej mona, 2) ej kein tarinae ko, im 3) ej leke eo an armij ippen ro me rej tel er. Im Confucius ej ba ilo an un kein jillu (3) im military equipment ej make wot driktata aurokin, mona ej kein karuo aurokin, im kein kajillu im auroktata ej leke

eo an armij ippen ro rej tel er. Ej ba aolep armij, of all man rather die of starvation, aolep armij remaron mij kin kolle ak rejjab konan tarinae. Botab aolep men im bareinwot aolep emaan, all man will die of old age ak kijwoj naj mij, ak lacking in confidence from the people our state cannot survive. Confucius ej ba, ak ijelikin aolep men kein, ne ejelok leke ippen armij ro kin ritel ro aer, eban survive, eban wonmanlok lal eo. Im ij ba naan kein kinke bwe in bar karoltok kojean nan unin kotobar in an motion in. Motion in elukun simple einwot adwoj melele, ej itan kajitok ippen Nitijela in, ippen Nitijela in mandate eo nan kakien e koj im tel lal in ad ebed ippen Cabinet eo. Majority eo ebed ke ippen Cabinet eo, im kememij bwe aolep ritel rein iloan mwin 33, rej represent -e aolep armij in Majol im melelein mandate eo an armij in Majol ebed ippen ritel rein ilo aer koba im juon wot. Im kio kajitok eo in me motion e ej wonmantak im mol ke jej konono kin bar elon kain un ko im ijo im ijo ak kajitok eo drein, mandate eo im leke eo an armij in Majol ebed ke ilo government in kio? Im ijo elukun naj alikar in ne jenaj itok nan ad vote.

Ewor juon bar naan ikonan bar quote -I tok nan kojean im kwon ba mokta jen ao quote -I tok naan in ao eliktata, ikonan kareilok kojean nan einwot an kar Minister Daisy Momotaro kwalok an leke im kautiej Jemen -Ei eo. Im elukkun alikar ke jelukun kaurok Jemen -Ei bwe enne lale mok petition ne ear drelontok, jej exercise -I maron eo ad iumin Jemen -Ei eo ilo Article II, Section 1 nan freedom of expression. Ak ejab jimwe me ear itok nan koj me jej exercise -I right kein nan ad express -I opinion ko ad ejab kin manit, ej itok jen Jemen -Ei, Jemen -Ei me armij in Majol rar kweppene 37 yio emotlok. Ejelok ir jen maron eo me emoj an itok nan ritel an Majol ilo Nitijela in, emoj an bar armij in Majol lelok nan er option in nan aer maronin komane juon motion bedbed ioon tomak eo aer im enin tomak eo aer, ejelok an government in mandate, ejelok bar juon un rej lemantak. Rejjab ba kin jabdrewot ruwon government in bwe rejjab ba kin ruwon government in, ruwon kajojo ian Minister rein, ej konono wot kin mandate eo an armij in Majol, jolok bwod ne enaj bin adwoj melele ak parliamentary system, system eo in me jej mour iumin, mae ien jenaj ukwote, ekwe we're stuck with it im option kein einwot an Minister Momotaro, Daisy Momotaro ba option kein rebed ipped.

Ekwe Mr. Speaker, ebar wor juon inaj kojemolok naan kein ao ilo juon im ikonan bar quote -I tok juon, quote in jen juon ian President ro me ebwe aer kar bunbun ilo America me ear eik Jemen -Ei eo an America, mottan lomaro me elap aer kar je Jemen -Ei eo an America, Thomas Jefferson. Im Thomas Jefferson ej ba ilo juon an kar leta im ij quote -I tok jidrikin wot ej ba "in a matter of style, swim with the current, in matters of principle stand like a rock". Im ej ba ilo kajin Majol ilo ao naj ba "ilo style ne kwoj bajjok konan jerbali jerbali ko kokonan komani im kokonan bajjok ao im kain kan, ekwe ao ibben boka eo ak ilo tide eo ak ibben ae eo ak this is a matter of principle, ewor juon menen koj lukkun tomak ke ejime im jejjet, lukkun jutak bin einwot juon dreka.

Ekwe Mr. Speaker, rejjab lemantak motion in konke jej kabod juon im juon, principle in ad im enin tomak in ad ke parliamentary system in ej functional im jej lore im jej stand like a rock. Kommol.

**SPEAKER KEDI:** Kommol Senator Silk. Einwot iar loe an Minister Bruce Bilimon kotak pein im ne enaj kar wor point in jabrewot ijone kwon kar state -i ak ne ededelok am kar bok kunam, ewor jet rej bed im konan bok kunaer. Ak inaj bar kojeblok nan eok mokta jen ao lelok nan minister e juon.

**MIN. BRUCE BILIMON:** Kommol Speaker. Im na inak wonin Confucius im na ibar jela ke ejjelok kein tarinae ibbed, ejjelok. Ijo ijela dre kein ruo ke ilo manit kein ad jej komejajeiki ke jen kautej dron im iakwe dron. Im ruo, ijela ke jinoin boktok meram nan Majol in, Ebon thru Bible, Bible make ej bar jiron koj ke kojwoj en iakwe dron. Ilo melele ne ikijien Jemen -Ei ebar lon ejja loan Jemen -Ei wot ke koban kalbuuji juon ak na ruon juon elane ejjelok bedbed...

**SEN. JOHN SILK:** Point of Order Speaker?

**SPEAKER KEDI:** Wonmanlok wot mok point of order eo?

**SEN. JOHN SILK:** Komelele ko ao iar lukkun make it clear, ijjab konono kon ruon juon im juon, ruon jabrewot ian minister rein ak President e ak cabinet e, ij konono wot kon nomba, principle in democracy im parliamentary system. Im ikonan, jouj im kajime minister e eutej ke ijjab konono ak ilo ao konono ijjab na ruon juon bwe ejjelok. Kommol.

**SPEAKER KEDI:** Kommol Senator. Inaj bar lewoj jidrik ien nan eok Minister im jouj im bed wot ilon un in konono in kab ijjab jela ej drelontok ia tok Ebon im gospel eo ilo konono eo ak wonmanlok wot.

**MIN. BRUCE BILIMON:** Ij bar konono ilo matter of principle. Ijjab bar jela edrelontok ia Confucius ak ikonan baj kwalok ke ij lukkun kautej e minister rein im aolep. Ijela in fact ilo jelalokijon e ao ebed ibben aolep jarkein ilon mwin iar jermal ibbeir im elap ao kautej. Ak juon in men ebed imaan im melele ko iar baj konan boktok ke ne kojean en konaan kon Jemen -Ei bwe na buruwo ebed ibben Majol. Im jen kalet aelon kein ad ilo tomak ko me ej itok jen manit ko ad, ritto ro ad, im ta ko me jej tomak kaki. Kommol.

**SPEAKER KEDI:** Kommol Mr. Minister. Im kio mokta jen ao lelok nan Minister Note, inaj lelok nan Minister Ading.

Wonmanlok wot Minister.

**MIN. JACK ADING:** Kommol Mr. Speaker. Kautej aolep ro drien kautej er, office ne am im Mr. President, eo an Vice Speaker, Iroj im Leroij ro ad, aolep rein mottaro ilo jikin kwelok in an armij in Majol, rein otemjej raar kobatok ilo elikin raeleppen rainin jen kej jibbon im elaptata nan aoleppen armij ro rej ronjake kwelok in an Nitijela im aoleppen armij ro aer Nitijela in.

Mr. Speaker, elon jermal ko rellap im jaikujin kar komani jen jinoin an kien in ekaal bok jikin nan rainin enanin juon alon kio Mr. Speaker ak lukun mol ejjanin wor juon jermal elap kien in enanin kar komane. Elon jermal ko rellap jaikuj kar komani ibben jarko likin ak jarko mottad jen ijoko ilikin, lal ko ilikin, organization ko ilikin, elon jermal ko rellap jaikuj kar komane ijokein ilo Majol in einwot adwoj jela im ej kab moj ad konono kon aikuj eo elap ikijien dren ak kio emaro aelon kein. Aikuj eo elap ikijien mona elaptata mona kab aikuj ko an ri outer island. Aikuj in elap nan ukot copra ticket ko nan cash, aikuj ko rellap im rellon jej jab maron in kwalok ilo tore in.

Im Mr. Speaker, naj lomnak ebwe, ebwe im elet adwoj konono kon vote in jelke in kab allegations kein im naj lomnak eien bwe jen kotlok bwe ro jenaj kalet er ilo iio in elikin ad komane vote in jelke in elane enaj mour innem ro tokelik ien bwe ren jeblak ilok nan office ko aer im jino komane jermal kein an armij

ro. Elane enaj mij ekwe kotlok bwe President eo kio kab cabinet in an en ilok in komane jermal kein bwe einwot eo ba elap aikuj kio. Ejjab nan ad komanman wot relationship ko ad ibben aelon ko ilik ak elaptata nan adwoj address -e issue kein rellap rejelmae kojean ilo Majol in rainin. Im win ak luuj kojean en wonmanlok wot im dispose -i motion in kio once and for all im lak moj jino bar jeblak liklok im komani jermal ko an armij ro. Im emoj an wor ruo motion ko kio im ne inaj lewoj motion e ao kio enaj kein kajillu ebwe in kio kojean en wonmanlok wot jen ijin. Kommol.

**SPEAKER KEDI:** Emoj ad move nan kiil debate im kar kalimur eo ao bwe nain lelok nan Minister Note eliktata bwe en letok wrap up in konono ko kio. Im jen ijin jenaj wonmanlok wot im komane vote eo kon kiil debate kab bareinwot vote eo kon motion in jelke eo.

Wonmanlok wot Minister.

**MIN. KESSAI H. NOTE:** Kommol Mr. Speaker. Inaj wonmanlok wot im kwalok jejo enaan. Ijoke maktata ikonan bar juon alen kamolol Anij ilo elikin raeleppen rainin kon men otemjej, mour im ejmour. Im ijelokin ikonan kokaal kile im kautej eo ao nan Iroj im Leroij ro ao ilo aelon kein, im ro rej tel koj ilo manit ko ad, im rikaki ro jemed, kora in rikaki ro jined ilo ekklessia ko woj adwoj kajojo. Im ko adean nan kien kein adean, kwe Mr. Speaker, im Vice Speaker, President in adwoj im senator im minister rein mottadean im kajojo mayor im councilman im exective ro ilo municipal government ko adwoj, ko ilo jukjukin bed kein ad, business community kab aolep armij in aelon kein. Ekar bwe an aitok statement e ao rainin ak meneo ke emoj an walok enanin aoleppen melele ko iar konan konono kaki rainin. Ak ikonan wot eddreiklok bar jet melele ak ikonan kwalok maktata ke elap ao impress im kanoj nebar enaan eo an President Casten Nemra ilo jibbonin rainin bwe ekitbujtok aoleppen kar melele ko woj kab kolmenlokijon woj joj naj kar aikujin kar konono kaki. Ebwe an to ao bed ilo Nitijela in im ne ejime ao kolmenlokijon ewor rualitok kio vote in jelke emoj aer kar jadetok ilo Nitijela in. Vote in Jelke in rainin ear itok ilo, kojijela in ear itok 14 raan in January eo. Im un ko nan komane vote in jelke ak ground ko bwe en kar itok raar itok ilo im raar jeje ilo January 25 raan enanin ruo wiik kotaer. Naj kolmenlokijon kon wawein an kar wonmantak vote in jelke in konke maktata ej kab wor juon ian vote in jelke kein rualitok ej bok jikin jilu wot raan elikin an government eo jinoe ak jillu working days elikin an kar government eo bok jikin.

Im kein karuo, ej itok kon enanin ejjelok un ijelokin wot nomba. Im kein kajillu, ij lale language ka ilo an kar wonmantak ke ebwe aer kwalok aer disrepect nan Office eo an President kab nan Kien in ad, ebwe an utej naan kein raar jermal ijin im einwot ne ejjelok kea im ejjelok kautej nan Office kein an aelon kein President eo ad kab ro rej jermal ibben. Im naj erreilok ke ewor juon mejatoto in kojdrat, im bwelen inebata kab wawein ko jet. Ak ealikka ilo tone im language in ear jadetok rainin.

Ijelokin menin, elikin an kar jadetok motion in im einwot am kar kojijela kake Mr. Speaker, jaar aikujin kottar ta ground ko iumin juon tore eo me ebwe an aitok. Ien eo wot ej jadetok ilo raan eo inne 25 raan eo kar lomnak eo bwe en kar kilok ad konono kake, jaar kajitok jidrik ien bwe en wor ien ad ekkatak kake, ejjab kon nomba wot ak kon allegation ko jet ilo motion in. Im ejamin let ad naj kar konono kaki bwe edrik ien ad ekkatak kake, jaar kajitok bwe en bar laplok ien ak naj baj lale kilen an kar wonmantak ear itok ibben an itok kojijela eo im motion eo nan vote kon secret ballot im lak moj jab letok elap ien nan

ad ekkatak kake bwe jaikuj kar konono kake ak jaikuj kar research im koman ad ekkatak bwe jen jela ta in jej konono kake im rebeltan konono kein ad im kolmenlokijon ko ad.

Im kein ka-jillu, ej itok ilo juon mejatoto eo me ej kokairir, kokairir. Ak kien eo ad in ilo aelon kein im jermal ko kein im ilju im joklaj eo an aelon kein in jej konono kake ejjab nan koj wot ak nan ajiri ro nejid kab generation ko, ebeben ko rej itok tokelik. Im ijo ke iar jadin einwot ilbok kon wawein in ak ilo juon wawein iar jab surprise bwe ijela ke naj kar plan ko kein. Ikonan roltok kio nan ao bwelen bar komejlok jet ian konono ko me raar itok ilo ikijien uak kein. Im einwot adwoj jela ruo issue kane naj loe ijin, juon ej ikijien mandate im juon ej ikijien nomba ak ilo juon wawein naj watoki ke ej juon wot. Elane jej konono kon mandate, ilo mol cabinet in ej jijet kio iumin tel im karok an President Nemra elikin an kar Nitijela in kalet im elikin an kar komane aoleppen bunton ko rej kollajrak ilo Jemen -Ei im ilo rule im ilo law kane ad nan ejake government in. Ilo mol entity eo ilo aelon kein drein ewor aer mandate, ej Nitijela in kon majority vote. Ejjelok im ejjelok juon ej letok mandate bwe ejjelok juon ijelokin kalet in an armij in Majol elikin an Nitijela ebed mandate ibben. Ejjelok ibben AKA, ejjelok ibben KEA, ejjelok ibben Solid 6, ejjelok ibben Fabulous 5, ejjelok ibben Fantastic 4 or whatever, juon wot ebed mandate ibben nan govern -e aelon kein ej enin ibben cabinet im jaar lori aoleppen procedure ko ekkar nan Jemen -Ei ne im bok kalimur ekkar nan Jemen -Ei ne nan govern -e aelon kein.

Ikonan wonliktak nan jidrik history bwe elane ear lap ien jemaron kar letok jet ian ilo ad rol liklok nan katak kon history. Ewor ilo governmen ibelakin lal in rej minority ak rej govern -e wot aelon kan aer ejjab ilo Parliamentary System wot ak ilo bar Presidential System. Elane jenaj lukkun etale kien kein jimor jenaj; elane ear lap ien jemaron kar provide jet ian ekkatak kein. Ak ej bedbed ion trust an armij, ne emoj aer kalet juon government, jekdron jete uaan ak elane emaron deliver service ak function einwot juon government innem rej kotlok im menkein ebar lon ilo history. Im elane ear koman menin rainin ejamin kar kein kajuon in ilo aelon kein. Ak elane konaj rol liklok ilo 4 raan in January in majority in ej ilo record kane, ej bed ibben government im tok nan rainin ejjanin wor menen elo bwe; ak ilo bwe in jela ke emoj an oktak.

Ikonan wonliklok wot jidrik nan einwot iar kwalok kon aoleppen vote in jelke ko me raar bok jikier. Im ijamin bok elap ien ak enanin aoleppen menkein jaar jolok elap ien im konono, ilo mol jet ien jej bok ruo im jillu raan in konono kaki. Ak ne vote jab in ak motion jab in, ekwe ej itok im einwot an ro raar jakemantak ejjab kon jabrewot un ak ej kon nomba. Im meneo iar kwalok ke jemaron kojermal nomba kein nan emmanlok eo an aelon kein im stability eo an aelon kein im adwoj mour im jermal, jiban dron, karejar ibben dron, lolorjake. Ak ne ba kajitok eo ao nan rein jet me elap aer ikdelel, elane kotobar eo in bwe aelon kein en jermal kon nomba ekar baj wor ke amiean lomnak in jutaktok ibben President e bwe en un nomba ko an? Elane eaorok nomba ilo lomnak in jermal ibben dron im nan promote -e aelon kein nan koman bwe ilju im joklaj eo an aelon kein en juon wot; ijela ebwe an lap kabel ibbemiwoj aolep ilo Nitijela in im etke kom ar jab kobatok ibben im lilok nomba ko ear aikuji einwot an kar kwalok ke enaj kar aikuji aolep. Ijela ekar wor karok ko raar iwoj nan jet iami im ilo mol rein me jej ron ke raar cross the line im ilok nan jet bar jikin ekar bar wor jikier ibben President eo. Jet iaer ekar moj an ilok offer ko bwe ren serve ilo cabinet eo an im President e ej kakememej ke offer kein rej bed wot nan rainin. Im uak eo ebed ibbemi jet iami ak rej bellokok wot nan ro me renaj monono in koman elane ej kotobar eo ad in bwe en lon nomba im kotobar eo ad in bwe joj en jermal ibben dron, ekwe ej belok wot position kein im kom

maron jadetok ro me rej kea kon emmanlok kab stability, continuity ilo service kein an government in adwoj.

Ak inaj kojemlok naan kein ao kon ao naj quote -i tok jet ennaan, ikonon kwalok ao kamolol jet ian rein raar jakemantak petition in, ne baj rikwelok eo ao jen aelon in Ebon im iburomej bwe einwot ekka amro konan kajitkin dron ilo jikin kein, ijela ke jemdron ko amro ilo Ebon rejamin oktak bwe ej eindrein jej juon wot ilo elon kain menkane woj me joj er rujlok im mour iloaer mantak nan rainin. Ak ilo an kar jumae bar juon vote in jelke ilo October 21, 2009 ekkar nan journal e ej kwalok ke vote in jelke kein rej aolep bedbed ion politics even naturally it's political ak jej aikujin kajitok ibbedwoj ewi leke eo an armij in aelon kein ilo government in ad im koman bwe lal kane ilikid ren ke leke koj elane jej komane wawein kein rainin? En wor ke aer kojatdrikdrik ke jermal ko jej komani ibbeir rainin im kwon ko jej karoki ibbeir ejamin melelein ke ilju rejako bwe kon wot an janij government. Ekwe ijo jej aikujin kolmenlokijkon kake in einwot an kwalok ilo journal e ear konono ilo October 21, 2009 eo. Nan roltok nan motion ne me ej wonlaktak kio, inaj bar rol liklok nan ejja bar minister im senator in wot jen Ebon, im ej konono kon nae jumae juon vote in jelke ear bar wonmantak im ekkar bwe jen konono kon....

**SEN. JOHN SILK:** Point of order Mr. Speaker.

**SPEAKER KEDI:** Ilo kautej Mr. Minister, inaj ja mokta kile point of order eo jen Senator Silk.

**SEN. JOHN SILK:** Speaker, jejjab konono kon vote in jelke ko remotlok. Jej konono kon vote in jelke in rainin, today, issue eo ne imaan Nitijela, Nitijela ej koweppene ke vote in ke jaab ke. Ak jejjab aikuj reiliklok nan record ko those are past, remotlok, ak jen konono kon kio. Point of order eo in Speaker. Kommol.

**SPEAKER KEDI:** Kommol Senator. Inna Mr. Minister, naj bar ronjake juon melele koj bar kwalok ijone ke ekadru debate kon vote in jelke jab in ak ne konaj bar lale record kane ne elon maan mejem, April 08, 2009 eo ear file vote in jelke eo nae kar Litokwa im administration eo an im Nitijela ear jab kwelok ear avoid -i kwelok ko im court ar order -e bwe en jeblaktok 18 raan eo im jaar vote -i wot ilo raan eo, ejab im ruo raan in debate. Im jen lak letok melele in nan public ren likio im itok bwe einwot kio bwelen jea ej iton kajeon control -e debate kane ak lukkun mol ejjab. Ewor rule ilo ejja rule im procedure kein adean wot, Rule 109 inkar envoke -i bwe en 15 minit juon rikonono ak ebwe an moj an le adean konono konke ikar kalimur ke inaj kotlok bwe joj en bok kunad im jokjok eo in. Im jouj im bed wot iloan ne komaron melele ko joj ar erra kaki im jean ej kiil debate im vote einwot emoj an wor juon motion elikio ijone.

Wonmanlok wot.

**MIN. KESSAI NOTE:** Ekwe inaj bwelen kokadruik ao konono kio Mr. Speaker, bwe einwot ealikkar ia ne koj itok jene im ealikkar ruling ne am. Ak elane....

**SPEAKER KEDI:** Point of order. Mr. Minister, ij kajitok karejar im kwon jouj im iburomej bwe ij aikuj point of order eok einwot juon ad seniority senator im minister iloan mwin. Ak jemaron ke karejar ibben dron im lore einwot an aolep lore rule kein, jokkun wot juon, ejjelok en ej loke including you and myself.

Jouj im wonmanlok wot.

**MIN. KESSAI NOTE:** Kommol Mr. Speaker. Im elane ro jet remaron kar konono tok jen katak ko an Confucius komaron ke kotlok bwe nain konono tok jen loan book e ej bed maan meja?

**SPEAKER KEDI:** Wonmanlok wot.

**MIN. KESSAI NOTE:** Inna ilo vote in jelke eo naj konono kake, ekar wor allegation ke ejjelok unin vote in jelke eo im nain wonmanlok wot im riti....

**SPEAKER KEDI:** Jolok bod Minister. Ebar wor juon point of order ijon, Senator Litokwa Tomeing, wonmanlok wot.

**SEN. LITOKWA TOMEING:** Kommol Mr. Speaker. Point of order eo ao naj bokmantak kake, menkein minister in ej konono kaki remotlok, im naj bed wot ilo melele ko ear kwalok an jea ke emotlok ko remotlok ak jen madjake menko rainin, an minit in, meneo jej madjake kio ej vote in jelke ne. Elon alen am ba jen vote ak jejjab vote.

**SPEAKER KEDI:** Kommol Senator. Your in order, emman point of order eo ej ellajrak wot ilo rule kane. Im inaj bar lewoj jejjab wot minit, jillu minit nan eok minister. Jolok bod bwe ebwe an lap ijo kwar ba ilo raan eo inne kab rainin. Im emoj an le jen 15 minit ak naj kon courtesy in nan seniority rein ilon mwin, kwe ne juon kab Senator e juon eutej, Iroj Litokwa jej kotloke. Ak lukkun mol rule e ej prohibit -e bwe en 15 wot minit.

Jouj im wonmanlok wot, ij bar lewoj 3 minit.

**MIN. KESSAI NOTE:** Inna ilo an kar ejjelok unin, ejjelok unin ak ilo an kar ro jet lo ke rejjab erra ilo vote in jelke eo, juon iaer ear kwalok naan kein ij ba, ne jej koman vote in jelke...

**SEN. JOHN SILK:** Speaker, point of order. Ej kab moj an in order e Senator Tomeing ak einwot ebar wonmanlok wot im konono kon mene kio.

**SPEAKER KEDI:** Nitijela ej kakkije jidrik. KAKKIJE

Ilo tore in Nitijela enaj wonmanlok kon eddo in an einwot an komlet ilo Jemen -Ei in an armij in aelon kein ejaak in Iroj ellap ro kab kajur ro droer im elikin an kar armij in aelon kein vote bwe en jokjokin dre in rainin. Im jea enaj wonmanlok wot im ejemlok debate. Ewor juon motion ekajur ion floor ne bwe en kilok debate. Im jenaj wonmanlok wot im entertain -i motion eo. Naj tomak emoj an ak jea ear fair nan kotlok nan aolep. Im elon jet etarjen jonan an etal minit ko aer. Im jenaj kotlok bwe jen wonmanlok wot jen ijin.

Im ewor juon motion ion floor ne bwe en kilok debate. Im ro eindrein aer lomnak ren ba aet? Ro einjuon jaab? Innem ekilok debate ilo raelepen rainin ikijien vote in jelke eo nae cabinet. Ekwe kio jenaj entertain -i naj motion eo elap ikijien vote in jelke eo nae cabinet in. Im ear wor juon bar motion ear bareinwot weppen bwe en wonmanlok wot ilo secret ballot im naj jokjok in drene adean komane ilo naj raelepen rainin. Im jenaj kakkije 5 minit, ij tomak Chief Electoral eo ej bed wot ije im enaj bareinwot itok rijerbal ra an Nitijela nan ajeje ballot ko. Im kajitok eo im kilen vote eo ilo jokjok in ellajrak eo einwot kar

motion eo kab an ellajrak ilo Jemen -Ei eo im rule im procedure ka ad. Kajitok eo ne, ro rej ba bwe vote in jelke eo en weppen ak en ella en je aet bwe en ella en je aet. Im ro rej ba bwe enjab ella ren je jaab.

Kojean naj kakkije 3 minit nan an Chief Electoral e koboos kein vote kein adwoj. Kakkije jidrik.

**KAKKIJE**

Elikin kakkije jidrik eo, kwelok kein an Nitijela renaj bar wonmanlok ilo raeleppen rainin. Im motion eo ne ilo floor kio nan vote in jelke ne im emoj an ajej aolep ballot ko an kajojo rikwelok rein. Kamolol e Chief e ilo an kar kobatok im rijerbal rein imaan.

Ikijien vote ne an jibbonin ak raeleppen rainin, ne koj erra bwe en mour vote in jelke eo koj wonmanlok wot im vote aet. Ak ne kojjab erra, koj konan bwe en mij innem koj vote jaab. Jouj im wonmanlok wot im komane kalet ko ami im elikin office eo an Clerk enaj wonmanlok wot im collect -i aolep ballot kein kajojo. Innem einwot ij tomak emoj an dedelok ballot kane an rutej rein. Madam Clerk, wonmanlok wot im collect -e ballot kein kajojo.

Wonmanlok wot Madam Clerk im tabulate -i tok ibben Chief Electoral ne result in election in an vote in jelke in. Kwalok jete ne ballot im wonmanlok wot im bwinbwin.

**CLERK:** Mr. Speaker, ije ibba imaan kio emoj an tobraktok ballot ko nan vote in jelke eo im ewor 33 ballot imaan meja im inaj bojak in kwaloktok kobban ballot kein.

Ballot e moktata, aet, aet, jaab Jaluit, jaab, aet, jaab, aet, aet, aet, aet, jaab, aet, aet, aet, aet, aet, jaab, aet, jaab, aet, jaab, aet, aet, jaab, aet, aet, jaab, jaab, jaab, jaab, aet, im ballot e eliktata aet.

**SPEAKER KEDI:** Jouj im kwalok result in jouj im jab kabbokbok. Jouj im kwalok result in vote eo kio, ikijien vote in jelke eo Madam Clerk im Chief Electoral.

**CLERK:** Mr. Speaker, tokjen tobrak in ekkalel eo kio nan motion eo, motion nan vote in jelke eo, Aet ej 21 im Jaab 12.

Kommol Mr. Speaker.

**SPEAKER KEDI:** Kommol Madam Clerk. Iumin Jemen -Ei eo kab ellajrak ko einwot an Jemen -Ei eo kalikkare innem emoj an weppen vote in jelke eo kon 21 vote im emoj an mour kio. Im Nitijela enaj kakkije jidrik ak 3 minit nan ad naj kirtok Legislative Counsel eo nan an bar advice -i koj kio ikijien bunton eo juon ekkar nan kar kajitok eo an Minister Atbi Riklon kon provision eo ikijien Article IV Section 8(2) kon ekkalel President iloan jonoul-emen (14) raan. Kakkije 3 minit. **KAKKIJE**

**SPEAKER KEDI:** Nitijela ej bar jeblaktok elikin kakkije jidrik eo. Ilo tore in kio ear wor juon kajitok elaptata legal interpretation eo an Jemen -Ei eo an armij in aelon kein ikijien Article IV Section 8(2) jen kar Minister eo an Justice, Atbi Riklon, kon naet eo jemaron kalet President eo einwot emoj an alikkar kio im emoj an President eo deem resign eja iumin wot Jemen -Ei ekkar nan vote eo kio eraelep.

Im inaj wonmanlok wot im kile Mr. Legislative Counsel nan wonmanlok wot im letok interpretation eo an kab melele eo an ikijien Jemen -Ei in.

**MIN. ATBI RIKLON:** Mr. Speaker?

**SPEAKER KEDI:** Wonmanlok wot Minister of Justice.

**MIN. ATBI RIKLON:** Section 7 paragraph 4, ej meneo iar kajitok in. Naet eo jej kalet President eo ekaal?

**SPEAKER KEDI:** Section 7 paragraph 4, go ahead Mr. Legislative Counsel.

**LC DEVINE WAITI:** Kommol Mr. Speaker. I'll take this time to give my opinion on the Article V Section 7(3 & 4)

Article 7(3) - now says that if the motion is carried by the majority of the total membership then the President is deem to have resigned in which then subsection four (4) kicks in now to state that fourteen (14) days are run from then. So in the Constitution Article 14 Paragraph 4 Section 2 says that when counting days, the days all start in the next day in which the event happened. So the fourteen (14) days starts tomorrow.

**SPEAKER KEDI:** Thank you Mr. LC. Are you then saying then we can elect the President starting tomorrow?

**LC DEVINE WAITI:** That is correct.

**SPEAKER KEDI:** Kommol. Senator Kramer?

**SEN. DAVID KRAMER:** Kommol Speaker. Im ikonon komane juon ao bebe bwe Nitijela en roltok ilju 10:00 awa jibbon nan ad kalet President eo.

**SPEAKER KEDI:** Ewor juon motion ijone nan kakkije mae raan eo ilju 10:00 awa ilju jibbon im emoj an second. Ro eindrein aer lomnak ren ba aet? Einjuon jaab? Innem Nitijela enaj kakkije mae raan eo ilju 10:00 awa jibbon.

Ilo kautej,

Journal Clerk

